

衆許摩訶帝經

宋西天譯經三藏朝散大夫試鴻臚少卿明教大師法賢奉 詔譯



清刻龍藏佛說法變相圖

眾許摩訶帝經卷第一 第二同卷

命二

宋西天譯經三藏朝散大夫試鴻臚少卿明教大師法賢奉 詔譯

如是我聞一時佛在迦毗羅國尼俱陀林中
爾時迦毗羅國有大釋眾而自思惟我佛世
尊於過去世何處所生何姓何族有何因緣
而思惟已告諸眾曰釋迦世尊於過去世何
處所生何姓何族有何因緣我等今者欲往
佛所而問此義如佛所說依教受持如是言
已與大釋眾即往佛所頭面禮足依位而坐
爾時迦毗羅國大釋眾白佛言世尊我等大
釋眾住迦毗羅國精舍之中而忽思惟我佛
世尊於過去世何處所生何姓何族有何因
緣我等不知今與釋眾來詣佛所而問此義
唯願世尊爲我宣說我等得聞依教受持爾
時世尊爲斷眾疑即說此義告釋眾曰我先

不欲宣說此義何以故所有諸魔外道若聞此事而復謗言沙門憍答摩自說其美所樂即說非樂不說有何所益爾時大目犍連在大衆中即從坐起瞻仰尊顏目不暫捨世尊告曰目連彼諸釋衆樂聞於我過去之事所生之處何姓何族有何因緣汝今志心而爲宣說爾時會中大目犍連默然思惟經須臾頃收僧伽梨衣安在頭邊右脅枕卧累足不動入三摩地而復觀察世尊過去之世所生之處若姓若族及因緣事如實了知無其錯謬即便出定於大衆前復坐本座尊者大目犍連告釋衆曰我於三昧觀彼憍答摩往昔之事世界壞時彼諸衆生命終之後而得往生徧淨天中生彼天已諸根圓滿身相端嚴衆苦不生身心適悅色相光明騰空自在以

天甘味而爲飲食壽量長時無中天者爾時大地大水所生滿虛空中猶如大海風吹波浪如煎熟乳其水清涼爲彼後時一切衆生所食清淨最上地味爾時大目犍連復告衆言當爾劫壞衆生生徧淨天者以彼天中福壽俱盡捨徧淨命二天生於人間所生之身亦如天界身相端嚴諸根無缺妙色廣大自有身光恒常照耀長壽喜樂騰空自在於其爾時無日月星辰無歲數月時等亦無男女衆生之相出生地味以爲飲食如是地味甘美細妙有情食已而生愛著於其後時貪味轉盛忽令身體而得沉重所有身光忽然不見於是世間普皆黑暗爾時有情見是世間普皆黑暗種種驚惶心生憂惱由是世間出現日月及星曜等始分晝夜及其時候如有情

壽命長遠無諸煩惱於其地味貪著多者色相損減而獲醜惡貪著少者其身色相恒自端嚴如是隨心分別二相黑白果報而彼衆生互相憎嫉而成不善以不善故由此地味即便隱沒以隱沒故令諸衆生心生熱惱作如是言今無所食深苦深苦又復思惟最上地味云何隱沒未來衆生云何得食令生苦惱疲乏之患而不可知不可言說爾時大地之中不久之間即生地餅其味殊妙馨香甘美如迦梨尼迦羅華而諸衆生食此地餅充益身體長壽安樂身相端嚴氣力增盛若諸衆生貪食多者色相損減貪食少者色相如故無其損減由此分別二相黑白而互相非行不善業令彼地餅隱沒不見以不見故而諸衆生復生苦惱作如是言深苦深苦又復

思惟所生地餅云何隱沒其義不知而諸有情即得飢困疲乏之苦未來衆生當於何食由是不久爲彼衆生復生林藤其色殊妙香味甘美如有情食此林藤氣力增盛壽量長遠形色端嚴人相具足又彼衆生貪食多者色相損減貪食少者色相如故如有情分別二相黑白而互相非行不善業由是林藤隱沒不見既不見已令諸衆生心生熱惱作如是言苦哉苦哉如是美味云何隱沒其義不知我等云何而得飲食由是不久大地之中出生自然上味香稻其稻依時自然成熟爾時衆生即取食之亦甚香美充溢肢體壽量長遠由是爾時食於香稻漸覺腹內有所妨礙而即思惟云何除去作是念已即生二根男女差別形相各異爾時有情於色香

味展轉愛著於自親愛而以香花衣服種種供養復以軟言慰喻歡喜令彼忻慶若有衆生於已非愛即便輕毀種種訶責或以瓦石互相鬪打行不善行又彼衆生所有過去正法今爲非法過去律儀今爲非律儀乃至晝夜時分亦顛倒分別譬如有人以斗量炭而爲平滿不正之行亦復如是以倒想故正法爲邪由是香稻亦復隱沒爾時大目犍連告釋衆言由香稻隱沒故令彼衆生逐日諸處尋求稻種而欲種之時有一人其性慵懶貪著財利雖有稻種而不能種此人知已而告之言汝有稻種與我少分我要種之彼人言曰我有香稻自要受用汝今若要我即與汝於後一日二日乃至七日却還我稻此人言曰善哉善哉若一日二日乃至七日或未得

還如至半月一月即得還之作是言已即自思惟自前香稻非種自生不假勤力自在受用今得稻種須住田野廣施勤力晝夜相續方得生長如是念已心生苦惱涕淚悲泣又復思惟過去之世所有衆生色相端正諸根圓滿人相具足身心適悅身有光明騰空自在壽命長遠所食地味猶如天饌而於後時於此美食生貪著故身即沉重光明即滅於是世間普皆黑暗又彼有情貪食少者身相不減貪食多者身相損減由此分別二相黑白互相輕毀行不善行由是爾時地味即滅地餅復生色相殊妙甘美馨香增益諸根身心適悅壽命長遠貪食少者身相不減貪食多者身相損減由此分別二相黑白互相輕毀行不善行爾時地餅亦復不見由此非久

復生林藤色相殊妙其味甘美亦如天食充益肢體壽命長遠貪食少者身相不減貪食多者身相損減由此分別二相黑白互相輕毀行不善行爾時林藤亦復不見於是世間有自然香稻從地出生其味香美可長四指依時成熟其味甘美充益肢體壽命長遠由是衆生貪愛增故所有香稻亦沒不見是故今者求此稻種住於田野廣施勤力方得成熟雖生稻米其米漸小於是衆生貪著地利廣占田野競多種植而行非法生賊盜想於他田種復行偷盜時有一人見是偷米如是一徧二徧乃至三徧而告言曰汝自有米何不自用云何於他而行偷盜從今之後勿更盜米賊聞是言猶不改過復於後時又行偷盜前人復見而責之曰前已誡汝勿行偷盜

何故此時又亦作賊即集多人共以責斷復於彼時於衆人中揀一具福德者立爲田主均分田土各令平等有不依法者令彼調伏田種若熟輸其少分以賞田主如是田主受行戒行安慰世間依法決斷合調伏者即便調伏由此世間立刹帝利姓名三摩達多王王有大臣名爲有情其王後時生一太子名爲愛子王有大臣名伊賀迦時愛子王生一太子名曰善友彼有大臣名帝羅迦時善友王復生一子名曰最上彼有大臣名阿跋羅建婁最上王有子名曰戒行彼有大臣名哆羅惹伽其王頂上生一肉醜其醜柔軟常以兜羅綿拂拂於肉醜無諸疼痛其醜後熟自然破裂生一童子福德端嚴具三十二相衆所愛重因以立名名頂生王纔下王頂即入

內宮爾時戒行王內宮之中有六萬宮人各有妳乳俱白王言我有妳乳願妳太子由此因緣亦名我妳王爾時世間所有衆生智慧漸增能細思惟稱量分別微細之事或是或非及工巧等是故立名號摩努沙爾時六大天子壽命無量有六大臣一名有情二名伊賀羅三名帝羅迦四名阿跋羅建姪五名哆羅惹伽六名摩努惹如是六大臣聰明多智能治世間有大威德時頂生王於其右股生一肉醅其醅柔軟常以兜羅綿拂拂於肉醅無諸疼痛於後醅熟自然開裂生一童子身相端嚴具三十二相名爲尼嚕有大智慧福德無量爲金輪王統四天下尼嚕輪王於其後時在左股上亦生一醅其醅柔軟常以兜羅綿拂拂於肉醅無諸疼痛醅後還熟自然

開裂生一童子端正殊妙具三十二相名爲波尼嚕智慧深遠福德無量爲銀輪王統三天下烏波尼嚕王還於後時向右足上生一肉醅其醅柔軟亦以兜羅綿拂拂於肉醅無諸疼痛於後醅熟自然開裂生一童子身相端嚴具三十二相名室尼嚕福慧深厚爲銅輪王統二天下室尼嚕王於左足上有一肉醅其醅柔軟以兜羅綿拂拂於肉醅無諸疼痛於後醅熟自然開裂生一童子色相端正具三十二相名摩尼嚕福慧深厚爲鐵輪王統一天下爾時大目犍連告釋衆言如是王位相繼至今其數極多如是衆許王有子名爲愛王愛王有子名善友王善友王有子名最上王最上王有子名戒行王戒行王有子名頂生王頂生王有子名尼嚕王尼嚕王有

子名烏波尼嚕王烏波尼嚕王有子名室尼
嚕王室尼嚕王有子名摩尼嚕王摩尼嚕王
有子名嚕啣王嚕啣王有子名酥嚕啣王酥
嚕啣王有子名母啣王母啣王有子名母啣
鱗捺王母啣鱗捺王有子名阿誡王阿誡王
有子名阿儼囉他王阿儼囉他王有子名婆
儼囉他王婆儼囉他王有子名娑誡囉王娑
誡囉王有子名摩賀娑誡囉王摩賀娑誡囉
王有子名舍矩彌王舍矩彌王有子名摩賀
舍矩彌王摩賀舍矩彌王有子名矩舍王矩
舍王有子名烏波矩舍王烏波矩舍王有子
名摩賀矩舍王摩賀矩舍王有子名酥捺哩
舍曩王酥捺哩舍曩王有子名摩賀酥捺哩
舍曩王摩賀酥捺哩舍曩王有子名鉢囉拏
耶王鉢囉拏耶王有子名摩賀鉢囉拏耶王

摩賀鉢囉拏耶王有子名鉢囉拏那王鉢囉
拏那王有子名摩賀鉢囉拏那王摩賀鉢囉
拏那王有子名鉢囉半迦囉王鉢囉半迦囉
王有子名鉢囉多波王鉢囉多波王有子名
縛彌嚕王縛彌嚕王有子名彌嚕摩多王彌
嚕摩多王有子名阿哩啣王阿哩啣王有子
名囉哩啣瑟摩王囉哩啣瑟摩王有子名曩
哩啣瑟摩多王曩哩啣瑟摩多王有子名阿
哩止娑滿多王如是等王子孫相繼共有一
百大國王皆都布多羅迦城於最後王生其
一王名降怨王彼王有大威德能降諸怨是
故名降怨王如是此王子孫相繼帝位不絕
有五萬四千王都阿喻馱也城又此最後王
復生一子名無能勝王彼王子孫相繼帝位
相承有六萬天子都波羅柰國於最後王又

生一子名耨鉢囉婆訶王子孫相繼有八萬
四千王都緊閉羅城於最後王復生一子名
梵授王子孫相繼有三萬二千王都賀悉帝
曩布里城於最後王復生一子名賀悉帝捺
多王子孫相繼有五千萬王都怛叉尸羅城於
最後王復生一子名婆多黎薩王子孫相繼
有三萬二千王都烏囉婆大城於最後王復
生一子名曩誡曩吟曩王子孫相繼有三萬
二千王都無能大城於最後王復生一子名
勝軍王子孫相繼有一萬八千王都瞻波大
城於最後王復生一子名龍天王子孫相繼
有二萬五千王都怛摩黎多城於最後王復
生一子名爲仁王子孫相繼有一萬二千王
亦都怛摩黎多城於最後王復生一子名爲
海王子孫相繼有一萬八千王都難多布里

也城於最後王復生一子名妙意王子孫相
繼有二萬五千王都王舍城於最後王復生
一子名婆多謨努那王子孫相繼有一百王
亦都波羅柰國於最後王復生一子名大軍
王子孫相繼有一千王都矩舍嚩帝大城於
最後王復生一子名海軍王子孫相繼有一
千王都補多羅迦城於最後王復生一子名
婆多半尼囉王子孫相繼有八萬四千王都
矩舍嚩帝城於最後王復生一子名摩呬目
佉王子孫相繼有十萬王亦都波羅柰國於
最後王復生一子名摩呬鉢帝王亦名地主
王子孫相繼有一百王都阿喻馱大城中於
最後王復生一子名持世王子孫相繼有八
萬四千王都彌體羅城於最後王復生一子
名大天王梵行清淨子孫相繼有八萬四千

王亦都彌體羅城於最後王復生一王名你
彌王彼王復生摩娛努王摩娛努王復生涅
里姤你彌佉努王涅里姤你彌佉努王復生
嚕波佉努王嚕波佉努王復生佉努摩曩王
佉努摩曩王復生佉努滿多王佉努滿多王
復生酥涅里舍王酥涅里舍王復生娑涅里
舍王娑涅里舍王復生酥嚕多細曩王酥嚕
多細曩王復生達摩細曩王達摩細曩王復
生尾你多王尾你多王復生摩賀尾你多王
摩賀尾你多王復生尾你多細曩王尾你多
細曩王復生阿輸迦王阿輸迦王復生尾誡
多輸迦王尾誡多輸迦王復生頗羅娑埤王
頗羅娑埤王復生惹羅娑埤王惹羅娑埤王
復生沒度摩囉王沒度摩囉王復生阿嚕拏
王阿嚕拏王復生你扇波帝王你扇波帝王

復生里娛王里娛王復生商迦囉迦王商迦
囉迦王復生阿難那王阿難那王復生阿那
里舍目佉王阿那里舍目佉王復生惹那迦
王惹那迦王復生散惹曩佉王散惹曩佉王
復生惹曩沙婆王惹曩沙婆王復生案曩播
曩王案曩播曩王復生鉢囉祖囉曩播曩王
鉢囉祖囉曩播曩王復生阿吟多王阿吟多
王復生波羅吟多王波羅吟多王復生鉢囉
底瑟恥多王鉢囉底瑟恥多王復生酥鉢囉
底瑟恥多王酥鉢囉底瑟恥多王復生摩賀
摩羅王摩賀摩羅王復生嚩賀曩王嚩賀曩
王復生酥摩帝王酥摩帝王復生涅里姤嚩
賀王涅里姤嚩賀王復生捺捨駄努王捺捨
駄努王復生設多駄努王設多駄努王復生
曩嚩帝駄努王曩嚩帝駄努王復生室左怛

囉駄努王室左怛囉駄努王復生尾吟多駄
努王尾吟多駄努王復生涅里婁駄努王涅
里婁駄努王復生捺捨囉他王捺捨囉他王
復生設多囉他王設多囉他王復生曩嚩帝
囉他王曩嚩帝囉他王復生唧怛囉囉他王
唧怛囉囉他王復生涅里婁囉他王如是等
子孫相繼七萬七千王都僧迦大城又最後
王復生一王名阿末麗沙王彼王有子名龍
護王子孫相繼一百王都波羅柰國又於最
後王生其一子名訖哩吉王爾時迦葉如來
應供正徧知明行足善逝世間解無上士調
御丈夫天人師佛世尊出見世間彼佛世尊
爲菩薩時持戒梵行發大誓願求無上覺於
兜率天而爲補處機緣成熟下生於訖哩吉
王宮捨位修行而成佛道爾時訖哩吉王有

一太子名曰善生此善生王復生王子如是
子孫相繼有一百王其最後王復生一子名
迦囉拏王於其後時生二王子一名瞿曇二
名婆羅捺嚩惹此之王子愛樂王宮貪於國
位恒自思惟安慰世間行於王事爾時瞿曇
王子恒復思惟衆生生死沉沒三塗苦惱輪
迴而難出離作是念已即詣父王稽首拜跪
而白王曰我今不樂王宮欲於山野修習梵
行而求出家王即告言汝爲我子所有國土
及於王位宰輔大臣如在指掌何故輕棄而
求出家瞿曇白言大王我觀三界如幻如化
無其堅實念念無常何堪愛樂我於今日辭
王出家王既聞已知子志意即便聽許爾時
山中有一仙人名訖哩瑟拏吠波野拏於其
山間以草爲菴居止修行時瞿曇童子即往

命二

十二

彼處踊躍歡喜五體投地頂禮仙足而白仙
曰我別王宮來於此處奉事仙人願賜攝受
如是仙人觀於太子志意堅固即便攝受爾
時童子即於山間採果給水奉事仙人如是
辛勤累經歲月師以彼童精勤不退即爲立
號亦名仙人於後父王迦囉拏而乃命終時
弟婆囉捺惹即紹王位行其國事時瞿曇仙
人知王命終告本師曰我今不能於其山中
採果給水欲往城中而自住止師即告言瞿
曇汝先來此善住山野何故於今却往城邑
汝今去時勿往城內只於補多落迦城側近
寂靜之處卓菴居止守護諸根精進梵行瞿
曇童子聞是語已即往補多落迦大城之外
寂靜之處卓菴結志崇修梵行

衆許摩訶帝經卷第一

衆許摩訶帝經卷第二

宋西天譯經三藏朝散大夫試鴻臚少卿明教大師法賢奉詔譯

爾時補多落迦大城有一婬女色相端嚴形體殊妙時有一人名彌里拏羅於此女人而生耽染即以金銀珠寶上妙衣服而給與之

命二

十三

忽於後時復有一人於此婬女亦生愛著告婬女言我以金錢五百與汝受用汝可隨吾同爲娛樂婬女聞已即與同行乃令侍婢往白彌里拏羅今有他適未遑相就拏羅聞言即告婢曰彼若歸家速令來至我住園林之中婢迴本舍具以其事白於婬女婬女聞已略無行意婢知不允復往彌里拏羅處具說婬女違背之事彼人聞已心生忿怒遣婢勸說速令至我園林之中婢既受教以種種方便誘引婬女婬女遂行彼人見已訶責之曰

我自昔來恒以衣服寶貨財物而常給濟何故於今棄背於我即持利劍殺彼婬女爾時瞿曇菴舍近彼園林彌里拏羅潛將所執利劍送置菴內而遂遁去時婬女婢高聲唱言此處殺人衆多聞已俱詣仙人所居菴舍獲彼利刃鮮血尚存衆人責言汝是仙人何故於今而行殺害作是語已即以繩索縛仙人手送往城中至王殿前衆人告曰此是出家仙人棄背梵行行不淨行復以利劍斷婬女命王聞是事心生忿怒即遣出城令以木簽貫其支體王宣令已是時仙人頂戴華鬘身著青衣從者周迴手執器仗高聲唱言此是犯戒殺人之賊爾時仙人都無怯怖至城門外即依王法爾時本師訖里瑟拏吠波野曩仙人來至菴中不見弟子即往隣近漸次尋

訪忽見弟子縛其手足在木簽上受如是苦
師既見已身毛驚豎悲淚涕泣問其弟子汝
何如有斯過罪又汝此身受諸苦惱晝夜
疼痛云何當忍弟子白言大仙我於此身求
諸疼痛都不可得師曰汝何如是離其苦惱

命二

十四

弟子白言我對師前發誠實願若吾此身實
無疼痛即令我師身為金色作是願已經剎
那頃師自變身作真金色一切人眾皆悉見
之是故立名金色仙人爾時弟子復問師曰
我此命終當生何處師曰准婆羅門法若絕
嗣子即無生處弟子曰言我作童子不樂王
宮捨位出家豈有子耶師即告曰汝於今者
何不思念在王宮時娛樂之事弟子白言我
今此身見受王法苦相如是云何而能思前
娛樂爾時金色仙人具大神通經剎那間於

虛空中降大風雨淋弟子身即得清涼離諸
苦惱平復如故由是弟子思前快樂而生欲
心滴二滴精墮地面上爾時瞿曇仙人有四
思惟一思惟自身二思惟衆生三思惟衆生
成佛四思惟一切佛剎如是思已其二滴精
結成二卵每日出時被日所照不久之間其
卵自破生二童子色相端正瞿曇仙人將此
二童子入甘蔗園棲泊居止瞿曇因日所炙
尋即命終爾時金色仙人來入園中問言童
子汝誰人耶童子答言我即瞿曇所生之子
金仙聞已心生歡喜因挈二童歸菴養育以
初生時卵因日照乃爲立名名爲日族爲第
一姓復是瞿曇所生之子因立瞿曇爲第二
姓又是自身所生因立阿儼囉婆爲第三姓
由於甘蔗園中收得養育因立甘蔗爲第四

命二

十五

姓爾時有大國王名婆羅捺噶惹其王命終無子嗣位輔相大臣共議斯事未委何人可當灌頂王位有一大臣白群臣言先迦囉拏王有一太子名曰瞿曇捨父王位於山林間事訖里瑟拏吠波野曩仙人彼是釋種可得紹嗣灌頂王位群臣聞已即往山中詣仙人所頭面禮足白言大仙過去迦囉拏王有一太子名曰瞿曇今在何處大仙白言久已命終復爲群臣具說上事大臣聞已心生懊惱我等今者甚得大罪作是語已見二童子身相端嚴問是誰耶金仙答言此即瞿曇所生之子群臣聞已俱懷踊躍今此童子是王種族即令繼紹灌頂王位是故立姓名甘蔗王此王之後子孫相繼有一百甘蔗王都補多落迦城其最後甘蔗王生其四子一名烏羅

迦目佉二名迦羅尼三名賀悉帝曩野四名蘇曩布羅迦生四王子已於其後時妃后命終王即愁惱以手搯頤情懷悲痛時有大臣見王不樂而共奏言大王云何而懷愁惱神情不悅王即答言我爲妃后今忽無常有斯痛苦大臣聞已而白王言我聞隣國小王王有一女具大福德端正殊妙堪爲國后王語群臣彼小國王欲侵我境云何成親大臣白言別有小國亦生端正殊勝之女若納爲妃甚適王情王旣聞已即遣使臣往彼小國具述王意欲聘其女立爲妃后小王聞已歡喜慶慰乃告使臣若大國王欲聘我女立爲妃后如生男子令紹灌頂王位我即許之使臣迴國具奏上事王聞所奏深情不悅我有長子合紹王位云何幼小而得立耶大臣白言

但且娉納後時有子男女未定王聞是語即以金銀珍寶羅紈疋帛嚴身之具迎娶歸國於後懷妊凡經九月載生一子身相端嚴乃於生辰群臣慶賀王曰今我是子當立何名大臣奏言彼小國王納女爲妃貴生太子繼王寶位今請立名名爲樂王命八夫人而爲乳母養育太子爾時大王欲令長子紹嗣王位其小國王知是事已心生忿怒即遣使臣具論前事先許我女生子爲王何故於今自違言約脫或如是我即廣將兵衆討滅汝國時大國王聞此語已即生愁惱告大臣言棄長立幼於理非宜群臣奏言彼小國王心力豪強善於兵戰舉戈犯境必貽敗衄若遣長子速疾出外即我家國當免兵禍王問是語默然未允爾時大臣共設權謀即於近郊造

命二

十七

一御園亭池華果林巒池沼流泉飛閣處處徧滿復以沉檀香木雜寶瓔珞種種嚴飾殿宇樓觀爾時大王長子與諸臣僚出城遊賞見此園林訪問左右是誰所有從臣對曰此是御園太子聞已即時迴馬左右勸請暫入觀覽太子告曰皇王御苑我何敢往從臣復曰若是臣下及諸庶民即不得入國王長子遊翫無妨是時太子即便入園作樂嬉戲有一大臣上請於王先造御園今已成就請王觀看王聞所奏即時臨幸俯近苑囿忽聞作樂王心疑慮大臣白言太子先是在此作樂王遂赫怒我造此園未曾遊觀云何太子先入作樂其罪難捨即令出國大臣諫諍王怒不已尋下詔命許將僕從及其眷屬與限七日出離國城太子承父王勅即與臣僚及諸

親愛出補多落迦大城去城匪遙而自安止
王復遣令遠處居住時雪山側婆伽囉河岸
邊有一仙人名迦毗羅淨持梵行菴居修道
太子復將眷屬依止仙人採獵禽獸以活其
命於後太子億念色慾顏容瘦悴仙人疑問
太子具言我思婬樂而致斯苦仙人白言勿
於親姊而行欲事餘可隨意太子耽著男女
衆多稚戲喧鬧日月滋甚仙人心不虛靜根
識散亂即告太子我今欲往別處營居太子
聞之深自慙感大仙於此修行歲久道果已
就不可遷移我於今辰將領眷屬別求住止
仙人聞已甚適本心即於菴居側近之處揀
殊勝地以金瓶水澆地爲界今太子住其後
人民熾盛眷屬繁多依界修城因建國土名
迦毗羅國復於後時有賢人指引別造一城

六二

十六

名曰指城王於此城亦號都邑爾時尾嚕茶
迦王問大臣曰我之太子今在何處大臣白
言今在雪山南婆伽囉河側迦毗羅城建二
大城以爲都邑臣僚士庶骨肉眷屬富盛繁
多有如大國時尾嚕茶迦甘蔗王曲躬俛首
問大臣言我之童子能有此事大臣白言太
子仁德致茲雄盛因立姓氏尾嚕茶迦甘蔗
王命終之後能仁嗣位能仁有子名烏羅迦
目迦王烏羅迦目迦王有子名若迦拏王若
迦拏王有子名賀悉帝王賀悉帝王有子名
努布囉迦王努布囉迦王有子名烏布囉迦
王如是子孫相繼有五萬五千王都迦毗羅
大城於後復有一王名十車王十車王後有
九十車王九十車王後有百車王百車王後
有畫車王畫車王後有最勝車王最勝車王

後有牢車王牢車王後有十弓王十弓王後有九十弓王九十弓王後有百弓王百弓王後有最勝弓王最勝弓王之後有畫弓王畫弓王之後有牢弓王此王於南閻浮提弓射第一時牢弓王有其二子一名星賀賀努王命二二名師子吼王爾時星賀賀努王生其四子一名淨飯王二名白飯王三名斛飯王四名甘露飯王淨飯王有二子一名悉達多二名難陀白飯王有二子一名娑帝踈嚕二名婆捺哩迦斛飯王有二子一名摩賀曩麼二名阿你樓駄甘露飯王有二子一名阿難陀二名提婆達多淨飯王有女名蘇鉢羅白飯王有女名鉢怛囉摩黎斛飯王有女名跋捺黎甘露飯王有女名細嚩羅悉達多有子名羅怛羅此之佛子是過去衆許王種族今值佛

世隨佛出家了悟生死善斷輪迴契證真空而成聖位爾時大目犍連說是語已即從座起合掌向佛佛言汝復本座善哉善哉汝能爲諸苾芻說於釋種過去所生種姓之事今諸苾芻快得善利長夜安隱時諸釋衆皆大歡喜信受奉行爾時迦毗羅國主星賀賀努王具大福德資財無量人民熾盛國土豐實去此不遠有一國土名曰天指城有王名酥鉢囉沒駄其國大富金銀珍寶處處盈滿彼王有妃名龍弭彌身色端嚴諸相具足於其國內有一長者宿植善本福德純厚眷屬熾盛庫藏衆多如毗沙門天王爾時長者有一園苑衆卉名華流泉浴池亭臺樓閣異獸靈禽無不具足時酥鉢囉沒駄王與其妃后及其眷屬來於此園作樂遊戲時彼妃后見此

園林種種華煥心生愛樂即告於王我要此園恒以遊戲王白妃言惟此園林長者所有云何能得我爲國王當自剏造即命國人大興園苑泉池臺觀勝絕第一名龍弭欄園爾時酥鉢囉沒馱王長夜思惟我今云何得生

命二

二十

一子爲金輪王如是思念忽於後時妃乃有娠懷妊九月誕生一女顏貌端正諸相具足福德智慧於其世間最爲殊勝如是衆人覩斯福相俱言希有應是毗首羯摩天所作或是幻化所成女生之後一日二日至三七日王爲此女集諸戚里及群臣等慶賀作樂即爲立名名爲摩耶其女身相而有八乳相師占曰此女後時當生貴子紹灌頂王位又於後時復生一女端嚴福相最爲其上初生之時有大光明徧照國城祥瑞非常因慶賀日

即爲立名名摩賀摩耶相師占曰此女生男具三十二相爲金輪王爾時酥鉢囉沒馱王聞彼星賀賀努王太子具有賢德即遣使人告彼國王我有二女一名摩耶二名摩賀摩耶初生之時師占言此之二女若後生子具三十二相爲金輪王星賀賀努王聞已告淨飯太子曰酥鉢囉沒馱王欲娉二女與汝爲妻若後生子必作輪王即遣釋種五百人等往彼迎女爾時邊國別有一族名半拏嚩率領兵衆於其要路欲行劫奪釋衆知已慮遭患害具述上事請王同行時王即白言我今年老馱於戎事今子淨飯躬自討伐如獲勝捷當自立願爾時星賀賀努王選練四兵付釋種等與子淨飯同殺惡族迎女迴歸即白王言王先所宣令別立願其義云何王即告

命二

三十一

言汝於今者當納一女以爲已妻如後有子善加保護令嗣國位及王歿後其大臣等共立淨飯太子即紹王位時王國界人民豐盛王與夫人及諸宮嬪恒受快樂時釋迦菩薩在兜率天宮欲生人間作五種觀察一觀種姓菩薩思惟若婆羅門吠舍首陀種姓非上非我所生若刹帝利我即當生以彼時人重富貴故若生下姓人所不重今爲攝化衆生令彼歸依是故當生刹帝利家二觀國土若其國土最上殊勝有上味甘蔗香美稻米肥力大牛無諸貧乞及鬭諍事如是國土名爲中國我即往生恐彼有情而興毀言菩薩過去修大勝因云何於今却生邊地三觀時分若有增劫八萬歲時有情根鈍智慧愚劣非爲法器是故不生若於減劫百歲之時雖近

五濁彼時衆生根性猛利機器成熟是故菩薩即乃下生四觀上族若淨飯王自過去世成劫之初衆許王後子孫相繼至淨飯王俱是輪王之族是故菩薩即往受生五觀母身若是女人智慧甚深福德無量諸相端嚴持戒清潔過去諸佛同與授記我即受生今見摩耶具上功德復是王種即乃生彼爾時菩薩作是觀已復告六欲天子汝今諦聽我當下生南瞻部洲託質摩耶汝等爲我降甘露雨令我受樂天子告言南瞻部洲有六大惡人一老迦葉二摩娑迦梨虞娑子三娑惹野尾囉致子四阿唎多繼捨迦摩羅五迦底切野六你誡囉切也帝子南瞻部洲復有六裸形外道一俱吒多努婆羅門二酥嚕拏多努婆羅門三摩儼婆羅門四梵受婆羅門

五布娑迦囉婆羅門六路呬地也 婆羅門
南瞻部洲復有六大力士一烏捺囉矩囉摩
子二阿囉拏三迦羅摩四酥跋捺囉五波里
沒囉惹迦六散耶摩拏縛迦如是一十八種
難可調伏爾時人間有一仙人年已衰老名
烏盧尾羅迦葉思惟言曰當此國土福勝之
地可十二由旬於其中間堪爲菩薩安坐說
法之處願得菩薩速降人間爲我說法令我
長夜甚得善利爾時菩薩告兜率天子汝今
爲我動一切樂諸天聞已競奏音樂爾時菩
薩吹大法螺其聲高遠過於天樂一切音韻
如是南瞻部洲一十八種難調有情菩薩以
無礙辯震大法音令彼有情自然降伏亦復
如是而說偈言

師子一吼衆獸伏 金剛一杵群峯碎

命二

三三

修羅無數一輪降 世間黑暗一日破
爾時六欲天子及天帝釋觀見菩薩乘六牙
白象下兜率天處摩耶腹即降甘露守護毋
腹清淨安隱而說偈言

我觀天子下閻浮 甘蔗王宮而受生
爲利有情酬宿願 如日初出放光明

衆許摩訶帝經卷第二

衆許摩訶帝經卷第三 同卷

命三

宋西天譯經三藏朝散大夫試鴻臚少卿明教大師法賢奉 詔譯

爾時摩賀摩耶作四種夢一夢白象口有六牙二夢白象從天來下入於腹中三夢自身上大高山四夢衆多豪貴大人俱來拜跪作是夢已即以上事告淨飯王王以此夢問其相師相師告王今此夫人必生太子具諸相好若在王宮作轉輪王若是出家修諸梵行成正等覺號天人師爾時菩薩降生之時大地震動放大光明衆生觀之歎未曾有帝釋天主護世四王各持刀劍繖索及弓箭等守護菩薩所有一切魔及非魔諸鬼神等而不能害如摩尼珠及迦葉迦寶所有一切穢惡塵垢而不能染菩薩之身亦復如是又今母身内外瑩淨猶如瑠璃能見菩薩色相諸根

如彼水精貫五色線分明顯露又令母身氣力增盛無諸疾苦志意堅固受持五戒精進無犯離諸過失爾時摩賀摩耶告淨飯王我於今日忽自思飲四大海水王以是語問諸相師相師答言摩賀摩耶必生太子具諸相好修無上道成等正覺若不飲海水太子身相而不圓滿時迦毗羅國有一人名羅羯多芻善解幻術王即召至於正殿內化四大海水取此海水與夫人飲飲此水已告於王曰所有一切牢獄禁繫苦惱衆生請王放免所有一切衣食貧乏寒餒衆生願王布施如是種種作諸福業爾時摩賀摩耶告淨飯王我今思於園苑住止王即告彼酥鉢羅沒駄王汝女摩賀摩耶樂住園苑酥鉢羅沒駄王即遣工人大興營繕地位寬博樓觀華煥名龍

弭彌園時摩賀摩耶與諸宮嬪同往園內見
無憂樹芬芳茂盛布葉開華即以右手攀彼
樹枝欲生太子觀諸人衆四邊圍繞示有慙
色天主知已乃作風雨令彼人衆四散馳走
爾時天主復自化身爲一老母在夫人前欲

命三

二

收太子是時太子初出母胎身如金山如真
金色令其老母收捧不及太子告言放放僑
尸迦我自出生是時大地即大震動放大光
明普照世間衆生見之歎未曾有時淨飯王
見斯祥瑞於太子前旋繞三匝禮太子足歎
言善哉善哉我於今日生大丈夫福德之子
令我長夜快得善利爾時太子身相圓滿內
外瑩淨猶如瑠璃塵垢雜穢一切不著於其
四方各行七步東方表涅槃最上南方表利
樂群生西方表解脫生死北方表永斷輪迴

時諸天人於虛空中持白傘蓋覆菩薩頂又
復諸天降二種雨或冷或溫灌頂沐浴又復
空中諸天及龍作天伎樂雨曼多羅華優鉢
羅華俱母那華奔拏里迦華及雨沉香檀香
末香多摩羅香上妙衣服等爾時諸天於虛
空中而說偈言

善生大牟尼 百福莊嚴相 斷盡煩惱塵
而證無上覺 能於圓滿身 放大光明色
遍照於世間 一切愚癡暗

命三

三

爾時天子說此偈已有四國王各生一子舍
衛國阿羅拏王生一太子王思惟曰我子生
時世界清淨湛然安隱立名鉢囉洗曩喻那
王舍城摩訶鉢那王生一太子王思惟曰我
子生時有大光明能照世間立名尾弭娑囉
俱尸那城設多你迦王生一太子王思惟曰

我子生時世界光明天地朗然立名烏那野
曩烏惹你國阿難多你弭努王生一太子王
思惟曰我子生時有大光明無諸幽暗立名
鉢囉愈多如是王子皆是菩薩聖感來生復
次去城不遠有一大山名緊使吉陀山中有
一仙人名阿私陀恒處其山修持梵行爾時
仙人有一外甥名曩羅那承事仙人求聞法
要仙人即爲說善惡法因此出家菩薩生時
有大光明照耀世間曩羅那見之驚疑不測
即入菴中問其師曰今此光明照耀世間猶
如聚日云何而來師曰今此光明如真金色
清涼寂靜照於三界此是佛生之瑞曩羅那
告於師曰我今往彼禮拜菩薩仙人告言彼
有大威德諸天龍神圍繞守護無能得見候
佛世尊入迦毗羅國聞名之時汝可詣彼大

得勝利復次菩薩生時有五百白象有五百
從人同時而生地中寶藏自然出現天降甘
露諸小國王並來慶賀爾時淨飯王見此祥
瑞種種殊勝而自言曰我子降生具大吉祥
能圓滿一切福德能成就一切善事應爲立
號名一切義成復次迦毗羅城有夜叉神名
舍迦嚩駄曩若諸衆生所有男女初生之後
將詣神廟令拜夜叉求其守護時淨飯王亦
令太子乘四寶車詣彼神祠將至廟庭夜叉
出迎拜於車前淨飯王曰天神至尊禮重菩
薩應爲立號名爲天子又釋衆等輩氣志剛
強難以調伏見此菩薩身相端嚴威容和雅
人天仰重即自迴心捨其憍慢情性柔順默
然瞻仰因斯立名名爲寂默爾時淨飯王告
諭宮人與我勤力養育太子依時乳哺洗浴

莊嚴用心保愛不令失所我子生時天降甘露相師視之有三十二大丈夫相若得在家作轉輪王乃有金輪寶象寶馬寶摩尼寶玉女寶主藏寶主兵寶如是七寶悉皆具足千子圍繞甚為希有勇猛無畏能破他冤爾時相師而說偈言

千輻金輪寶 轂輻相周圓 飛空行四方
須臾復本處 象寶最殊勝 白類於珂雪
巡遊瞻部洲 隨處而無礙 馬寶足威勢
青頸世希有 常往虛空行 往來如風轉
最上摩尼寶 光照一由旬 如夜黑暗中
當天出明月 女寶世希有 微妙甚端嚴
親侍於輪王 能知所思事 藏寶大威德
能主世間寶 海中地下珍 王須即令現
主兵臣巨力 能使於四兵 象馬步兼車

令三

五

所到無違背

爾時淨飯王復問相師云何我子三十二相相師答言三十二相者一太子足下有千輻輪紋轂輻輞三悉皆圓滿二太子手足皆悉柔軟如兜羅綿三太子手足猶如鵝王而有網縵如真金色四太子手足諸指纖長五太子足跟與趺相稱六太子足下平滿如香奩底七太子雙腩漸次纖圓如金色鹿王腩八太子雙臂修直如象王鼻垂手過膝九太子陰相藏密不見亦如龍馬及其象王十太子身諸毛孔各一毛生紺青旋轉十一太子髮毛端直上靡嚴金色身衆所愛樂十二太子身皮薄潤塵垢不著十三太子身皮金色光曜如妙金臺衆寶莊嚴人天愛樂十四太子手足掌中頸及兩肩七處充滿十五太子肩

頸殊妙一一圓滿十六太子雙腋之下一一
充實十七太子容儀廣大圓滿端嚴十八太
子身相修廣端正出過人天十九太子體相
周匝圓滿量等諸瞿陀樹二十太子領臆身
之上半威容廣大如師子王二十一太子常
有光明面各一尋二十二太子齒具四十齊
平如雪淨密根深堅固不動二十三太子口
有四牙鮮白鋒利二十四太子口中一切所
食常得上味能正吞咽津液通流永離衆病
身心適悅二十五太子舌相廣淨能覆面輪
至髮際等二十六太子梵音洪雅其聲震響
猶如天鼓言詞婉約如頻伽音二十七太子
眼睫作青紺色猶如牛王不相雜亂二十八
太子眼睛紺青鮮白紅環相間青白分明二
十九太子面輪如天滿月三十太子眉相彎

命三

六

長如天帝弓三十一太子兩眉中間有白毫
相右旋柔軟如兜羅綿鮮白光淨逾於珂雪
三十二太子頂上有烏瑟膩沙金頂之骨高
顯周圓亦如天蓋如是三十二大丈夫相於
過去世無量百千萬億劫長時精進無間修
習一切戒行及諸善法而無遺餘今得成就
相好功德是故菩薩生淨飯宮飲食衣服卧
具象馬一切珍寶無不具足眷屬熾盛王族
不斷於人天中而無等等若不出家年三十
二作金輪王爾時摩訶摩耶生太子已七日
命終生忉利天受五欲樂爾時太子顏容端
正人天目覩敬愛不足假使世間巧妙金師
以金造像亦復不及譬如諸天半努迦石有
大光明照耀一切菩薩之身光明寂靜亦復
如是又如蓮華開敷出水菡萏馨香一切有

情見者愛樂菩薩之身見者恭敬亦復如是
又此菩薩兩目清淨明朗遠視見一由旬微
細塵色過於天眼晝夜無異又此菩薩語言
音聲美妙清響如頻伽音亦如雪山有其飛
禽食於花水食已而醉發聲相呼其音和雅

命三

七

亦復如是爾時曩羅那仙告白本師阿私陀
仙人我今往彼迦毗羅城禮拜菩薩師言可
往即與本師運神通力往迦毗羅城去城不
遠菩薩威制令彼失通步行至城詣淨飯宮
時守門人即以白王乃勅門人引令入內王
相見已歡喜無量請就牀座獻闕伽水作樂
設食種種供養王即問言仙人云何因緣至
此時阿私陀白王我今欲見一切義成大人
尼師王言今此太子正當睡眠且候須臾即
得相見時阿私陀請就牀帷臨視太子爾時

太子雖處睡眠兩眼俱開目不眴動時阿私
陀即說偈言

諸天觀境時 觀物眼不眴 菩薩雖睡眠
觀境亦如是

爾時仙人說此偈已宮人乳母捧持太子奉
上仙人時阿私陀詳觀太子容貌非常即問
王言曾有相師來占相否大王白言有婆羅
門相此太子若不出家必得轉輪王位若能
出家定成正覺仙人聞已即說偈言

昔墮邪見外道身 今逢福德輪王子

能除煩惱證菩提 善說甚深法海藏

雖圓相好棄輪王 成大人尼救群品

是故我今歸命禮 願得親近滅塵勞

爾時仙人說此偈已審觀自身壽命長短得
見太子成佛事否如是觀已得見太子出彼

王城入於山野年二十九於其山中六年苦
行證甘露滅成無上道爾時仙人復觀自身
值佛出世年命短促而不久遇甚懷感傷不
覺失聲而自啼哭時淨飯王見仙人哭驚怪
異常即說偈言

命三

若人有男女 愛憐心不足 如是福相殊
觀之恒適悅 仙人見太子 云何而啼哭
我子若驚怖 忽然生病惱 未委意云何
速爲我宣說

爾時阿私陀仙人聞是偈已即白王言太子
不久即成正覺云何於身而有怖畏假使空
中降大金剛如彼真珠滿空而下不能侵彼
菩薩身之一毫世間所有一切大火而不能
燒一切大風而不能吹一切毒藥而不能損
刀劒弓箭而不能傷毒龍猛獸而不能害又

此菩薩於過去世行大慈悲於諸衆生未曾
捨離今彼有情常獲安隱云何菩薩有斯怖
畏於虛空中恒有帝釋梵天王等而共守護
我今啼哭自觀已身年命中夭於其佛世不
得聽聞甚深法藏於其善財而無有分是故
感傷而自啼泣請王無憂爾時阿私陀又復
思惟我有神通菩薩威制今不顯現是故步
行入於王宮今若出城而復徒步彼諸有情
即起慢心大神通仙步出王城作是念已告
淨飯王我今辭王出迦毗羅城與我修治四
命三
衢道路時淨飯王即勅有司修治道路去除
砂礫穢惡之物以白檀香水灑地清淨處處
豎立幢幡瓔珞燒衆妙香王并諸臣長者居
士恭敬圍繞出迦毗羅城送彼仙人時阿私
陀辭國王已隨意前行往枳瑟計駄山即住

山中修習禪定歲月不久復得神通於其後時身少有病服食良藥及華果等乃得除愈弟子告曰我今出家爲求出世解脫甘露師有所得願賜告諭師曰我自修行歲月彌久於斯甘露猶尚未得云何令我復爲於汝今有淨飯王子名悉達多成等正覺得真甘露於彼出家一心梵行而求出離莫作族姓之相及我人相即得成就無爲之法爾時阿私陀仙人即說偈言

我住如是山 久修於梵行 雖復得神通而未飲甘露 自知身無常 恒處於生滅 聚集假和合 即是無常法

爾時仙人說此偈已曩羅那感師誨示禮拜供養即往波羅柰國見五百摩拏嚩迦婆羅門念圍陀經知非究竟而不親近即往佛所

希聞法要爾時曩羅那姓迦底切也以姓爲名佛爲開示法要得寂滅樂乃名大迦底切復次太子在乳母懷執金器而食須臾食已乳母即收金器器重如山舉之不起即以上事具告於王王與宮人同往取器亦不能舉即集國人同舉金器其器愈重復駕大象五百頭拽彼金器不能搖動金器少分何以故由菩薩神力舉其左手一指鉤住金器令象盡力而不能動爾時淨飯王乃自思惟若菩薩舉其兩指鉤彼金器假使百千大象亦不能動由是菩薩有千象之力若諸童子欲與菩薩鬪戲如小飛鵝比於大鶴其力不等復次菩薩在王宮時與五百眷屬入學讀書爾時本師將第一書令太子讀太子告言此書我解其師乃令讀第二書太子見之復白

師云此書亦解於是本師即以五百種書授與太子太子白言此五百種書我一一俱解如有他書即當與我師乃白言於其世間只有此等五百種書此外無有爾時太子即自寫書令師讀之師乃歎言我自昔來目未曾覩太子告曰此是梵書時彼梵王知我當紹輪王之位傳授於我即以微妙梵音而自讀誦時大梵天王於虛空中高聲讚言此是梵天之書師聞天證深生信解爾時太子舅氏娑捺梨復有一人名娑賀你嚩此二人者善解弓射有五百人親學其藝又此二師互相言曰彼提婆達多其性羸惡心多嫉妬所有射法不宜告之若或教授必將害物彼悉達多慈悲聰慧利濟有情堪當傳習如是弓射有其五種一曰遠射所發之箭能極遼遠二

命三

十一

曰聞聲射聞其聲音即可射之三曰中射所發之箭隨意而中四曰親的射所發之箭而無踈闊五斷物射所射之物無不透斷如是菩薩善解五射爾時毗舍離城有一大象形相端正具大勢力彼國人衆咸共商議迦毗羅城淨飯大王有一太子名悉達多相師視之有轉輪王位即馳此象而充貢獻乃以珠璣珍寶種種嚴飾將往迦毗羅城至王宮門時提婆達多出門見象詰問門人曰此象從何所來門人答言毗舍離城聚落人衆爲悉達多有轉輪王分馳獻此象時提婆達多聞是事已心生嫉妬告門人曰彼悉達多何有王位即持器仗殺象命終爾時難陀見此死象知爲提婆嗔怒所殺難陀欲與聞其勇力即執象尾以手擲之象離本處七步之外時

悉達多見其死象離於本處知是難陀示威
力故手執象尾擲彼處故爾時悉達多太子
顯自威神以其一手執持象尾向空而擲過
七重城如投土塊時毗舍離城獻象之者見
悉達多有大力即說偈言

我等遠馳象 爲獻於輪王 遇斯凶惡人
即時行殺害 難陀手執尾 擲象七步外
菩薩大威神 擲象如拋塊

衆許摩訶帝經卷第三

衆許摩訶帝經卷第四

宋西天譯經三藏朝散大夫試鴻臚少卿明教大師法賢奉 詔譯

爾時提婆達多手持弓箭出迦毗羅城而欲
教射悉達多太子知已與五百眷屬亦出國
城同爲弓射時提婆達多即持弓箭遙射一

命三

十二

樹其樹中箭應弦而倒悉達多太子亦射一
樹箭力甚大樹雖兩斷儼然不動提婆達多
見樹如故疑箭不中白太子言常聞太子解
五種射法云何射樹而不能中如是言已帝
釋天主於虛空中而自思惟我須今日顯發
菩薩神通威力若不如是云何有情知彼菩
薩善能通達一切衆事作是念已即化大風
吹中箭樹忽然倒地時提婆達多即自驚歎
爾時太子又令安置七多羅樹七重鐵鼓七
重鐵豬令衆射之時提婆達多顯自威力挽

弓前射透一多羅樹難陀次之透二多羅樹
悉達多太子即便隨射所有七多羅樹七重
鐵鼓及鐵豬等皆悉透過其箭入地至龍王
宮爾時龍王見菩薩箭以手捧之於箭入處
涌水上流即有信心婆羅門長者起塔供養
一切苾芻常來瞻禮爾時悉達多太子乃乘
寶輦迴歸王城有一相師占太子曰至十二
歲若不出家爲轉輪王統領四洲千子圍繞
時淨飯王聞是事已心大歡喜即集群臣及
諸釋種具白斯事時有大臣白淨飯王若要
命三
太子紹輪王位速於國內公卿臣僚士庶之
舍選擇淑女爲其妃配仍造種種上妙衣服
真珠瓔珞珍玩之具及舍宅樓閣等如是造
已即選良辰令太子於王正殿坐師子座命
公卿臣僚及長者居士等所有童女悉赴王

十三

宮如有端正福德殊勝之女太子樂者即賜上件珍玩物等納爲夫人爾時淨飯王即依所奏後至吉日命悉達多太子登王寶殿坐師子座所集童女俱來赴會爾時有一童女名耶輸陀羅而不赴召父問其故耶輸陀羅曰金帛財貨我家自有何須王宮而受錫賚父又告言汝至王宮太子見已或當採擇納爲夫人豈獨寶玩而充贈遺耶童女聞已即著上妙衣服嚴身瓔珞而赴王宮太子見是童女福相殊勝身有光明心大歡喜下師子座依古儀禮互相設拜拜已復坐合掌恭肅時僚等俱白王言如是童女諸相具足福德深厚堪與太子爲其夫人王即詔命二萬童女圍繞耶輸陀羅同入宮室爾時迦毗羅城不遠有一大河名嚕賀迦於河岸上有一大

樹名娑囉迦里梨也切擊與太子同時而生此樹不久長及百肘太陽未出樹身柔軟爪甲能傷日既昇天則斧不能入火不能焚尋以河津汎漲浸壞樹根偃仆洪川下流乾涸時酥鉢囉沒馱王以嚕賀迦河爲大樹所塞水不通行國內民衆乏水受用發使出國告淨飯王顛木壅流邦人大恐欲假太子神力去樹導川時淨飯王默然不允若太子自去即當隨意有大臣名曰餐那潛知王意以方便力告太子言嚕賀迦河旁有園苑亭臺樓觀命三十四華卉池沼甚是嚴飾可去遊從太子聞言即與眷屬及諸臣僚同出迦毗羅城往彼園中隨意遊戲時提婆達多見一飛鵝從空而過挽弓仰射墮太子前太子見之嗟念傷害與拔其箭放鵝飛去提婆達多遣人取鵝太子

告曰我發菩提心常行慈愍行利益諸有情
不欲見損惱所有飛鵝拔箭放去令彼安隱
汝宜迴心勿生嗔恨提婆達多聞是語已默
然不悅爾時酥鉢囉沒馱王知其太子近在
園林即遣國人往彼河津出其大樹唱聲用
力響震郊原太子聞之訪諸左右群臣具白
此是酥鉢囉沒馱王遣其人衆出河中樹太
子聞已我當自往去河不遠有一大窟毒龍
所居太子至前龍乃出窟衆人恐懼慮傷太
子即以利劍斷彼龍命龍有毒氣被觸之者
徧身青黑因以立名迦路那夷太子行至河
邊先令提婆達多出彼大樹提婆達多極其
神力終不能舉次及難陀盡力挽樹稍離於
地是時太子以已神力手把大樹折爲兩段
擲虛空中於河兩邊各下一段告衆人言此

命三

十五

娑囉迦里梨也切拏樹是大良藥火不能燒若
有瘡腫塗之即差汝等衆人勿復忘失太子
作是語已即乘車騎迴歸城邑時有相師相
太子曰若至七歲而不出家作轉輪王太子
入城將至王宮釋種伽吒儼里有一女名娛
閉迦在高樓上忽見太子身相端嚴心生戀
仰太子見此女已令住車騎迴首觀瞻手執
弓箭不覺墮地時諸人衆見此童女福相殊
勝皆言此女堪事太子父淨飯王知是事已
遣童女二萬圍繞娛閉迦女今入王宮爾時
太子納夫人已思惟城外遊觀園苑即告御
車人阿戠多汝今諦聽我思城外遊觀園苑
與我如法安置莊嚴上好車騎時阿戠多聞
是語已即於廐中如法莊飾上好車騎至太
子前爾時太子即乘車騎出於城外於其馬

前見一老人髮白面皺策杖呻吟太子不識問阿諶多此是何人阿諶多曰此是老人太子問云何名爲老阿諶多言幻化之體無有堅實四相遷移六情昏昧起坐無力執杖而行名之爲老太子問云汝能免不阿諶多曰我何能免太子問云汝即不免我能免不阿諶多曰貴賤雖異幻體一般日月推遷無人能免太子聞已不悅而歸復自思惟四大假合五蘊無實始自少年便成衰老如是之相深可悲愍爾時淨飯王問阿諶多曰我子出外有何所見阿諶多曰太子出外見一老人髮白面皺具說上事王旣聞已憶前相師占言太子後必出家太子於今安處深宮受五欲樂情必愛著而不出家即說偈言

王聞相師占太子 恐後捨父求出家

十三

十六

今以五欲悅其情 愛著必繼輪王位
爾時太子又復思惟出城遊觀即告阿諶多汝今諦聽我思城外遊觀園苑與我如前安直莊嚴上好車騎時阿諶多聞是語已即往厰中如法莊飾上好車騎至太子前爾時太子即乘車騎出於城外於其馬前見一病人形體羸瘦心神劣弱太子不識問阿諶多曰此是何人阿諶多答言此是病人太子問云何名爲病阿諶多答云四大之體互相乖反而有病生形容瘦惡心識無安此名爲病太子問云汝能免耶阿諶多言亦不能免又復問言汝旣不免我免得不阿諶多言俱是幻質云何獨免太子聞已即歸王宮復自思惟假合之身衆病所集衆生愚迷深可憐愍時淨飯王問阿諶多曰太子出外有何所見爾

時阿譏多具說上事王既聞已恐子出家復
今宮中以五欲樂娛侍太子即說偈言

色聲香味觸最妙 娛樂深宮太子情

若生愛樂而貪著 應不出家求覺道

爾時太子復自思惟出城遊觀即告阿譏多

汝今諦聽我思城外遊觀園苑與我如前安

置莊嚴上好車騎時阿譏多聞是語已即往

廐中如法莊飾上好車騎至太子前爾時太

子即乘車騎出於城外於其馬前見一死人

氣絕神逝猶如土木瓦石無所知覺男女眷

屬圍繞悲哭問阿譏多曰此是何人阿譏多

答云此是死人太子復問云何名死阿譏多

答云有爲之體壽有短長一旦無常永別親

眷此名爲死太子聞已問阿譏多曰汝能免

不阿譏多答云亦不可免太子問云汝身不

免我應免得阿譏多答曰三界無常生滅不

住太子之身亦復如是太子爾時心不適悅

却歸王宮至王宮已而復思惟無常之法念

念不住乃至有色無色非想非非想處無有

免斯無常大患於諸衆生深可悲愍作是念

已情不適悅爾時淨飯大王問阿譏多曰太

子出外有何所見爾時阿譏多具如上事一

一宣說王既聞已思念昔時有婆羅門占相

太子福德淳厚諸相具足決定出家成正覺

道即令宮內以五欲樂種種適悅令彼愛著

捨出家意即說偈言

我以五欲大富貴 適悅太子天中天

今彼無心求出家 付與輪王最上位

爾時悉達多太子復自思惟出城遊觀即告

阿譏多我思城外遊觀園苑與我如前安置

莊嚴上好車騎於是阿譏多即往廐中如法莊飾上好車騎至太子前爾時太子即乘車騎出外遊觀時兜率天子作是思惟今茲菩薩出城遊觀求出家緣我應當作沙門之相持鉢乞食現太子前作是念已即剃鬚髮身

命三

十六

被法服手持應器住立馬前太子見已迴問阿譏多此何人耶阿譏多答言是出家人太子問云何名出家阿譏多答言此人了悟生死誓斷輪迴修菩提因求解脫果剃除鬚髮身被法服清淨身心此名出家太子聞已心生踊躍即便下馬而問苾芻云何出家有何利益苾芻答言夫出家者離其親愛不著榮樂恒修梵行堅守律儀棄背塵勞禁縛根識妄念不生實行增長如是進修名出家者太子聞已歎言善哉汝大丈夫於其濁世能善

調伏能善勤求是真出家是真善友言已頂禮上馬歸宮即於宮中至意思惟出家之法其行甚妙其理甚深猷離王宮欲求解脫時淨飯王問阿譏多曰太子出遊有何所見得悅樂不阿譏多遂巡具白上事王聞所奏又復思惟相師曾言若不出家必作輪王我須今展別設方便令彼太子斷出家意即告悉達多迦里沙迦聚落國之重地汝今往彼代吾撫臨當使一方人民和悅太子聞已迷悶不樂晝夜思念專求出家未遂本心往赴迦里沙迦聚落行至路次有五大寶藏從地涌出主藏神等白言太子此等寶藏菩薩所有唯願菩薩爲我受之太子告言此等寶藏衆寶所聚有情愛著非我所求主藏之神聞菩薩言知不領納即率同類入於大海爾時太

命三

十九

子漸次前行至迦里沙迦聚落之界見有多人各執牛具苦力耕種手脚羸惡塵土全身衣服破弊飢渴無力如是種種苦惱逼迫太子宿懷慈愍見之驚問左右告曰此是太子部內耕種之人太子聞之即令放免丁壯牛畜任自營生不令官司更有拘檢作是語已即往閻浮樹下結跏趺坐而入禪定其諸臣僚僮僕吏民亦於樹下圍繞侍立經於食時淨飯王心自思惟太子出外已過時約由未迴歸我當自往觀視太子即嚴車駕出臨聚落至閻浮樹下乃見太子入三摩地身心不動日色雖轉樹影不移時淨飯王歎言善哉善哉大威德大丈夫甚爲稀有日行不住樹影不移以頭至地禮菩薩足而說偈言
善哉大丈夫 世間甚稀有 生時放光明

大地皆震動 今坐閻浮樹 日轉影不移 時衆普見聞 我今歸命禮
爾時太子從禪定起即乘車輦歸迦毗羅城經尸陀林見彼林中而有死人裸形臭惡支體壞爛於其世間深生厭離王與太子入迦毗羅城時有相師瞻見太子威德殊異告淨飯王今此太子於七日內若不出家定有轉輪聖王之位爾時相師即說偈言
大王今當知 悉達多太子 七日不出家 當作輪王位 統領四大洲 富有於七寶
今三
如成正等覺 法財救世間
二十
爾時相師說此偈已太子進車而漸前行時有釋種名迦羅叉摩其女名蜜里誡惹瞻見太子威儀尊重而興讚歎於太子前即說偈言

父得解脫樂 母身亦復然 生此悉達多
願與我爲夫 當成二足尊 圓證涅槃法
名聞徧十方 我今歸命禮

爾時太子聞是伽陀心生歡喜即以真珠瓔珞承其威力入窓牖中安著女項時淨飯王見是事已即以二萬宮人圍繞蜜里誒惹女入於王宮爾時太子有三夫人耶輸陀羅娑閉迦蜜里誒惹及六萬宮人朝夕供侍心無愛著專求捨棄時淨飯王知是事已告諭三王有婆羅門相我太子若七日內不令出家必作轉輪王汝等諸王於七晝夜可共守護復起民衆造七重城七重壕塹城安鐵門於門上下徧置鈴鐸若開門時鈴聲震響一由旬外爾時太子於其內宮與諸宮人妓舞作樂晝夜無異時淨飯王詔令群臣於諸禁掖

第三

三十一

處處防衛仍遣四兵象馬車步於城四門分布巡察時淨飯王在城東門斛飯王在城南門白飯王在城西門甘露飯王在城北門各領臣僚夜不睡眠專心守護復命大臣摩賀曩摩於其夜分不住來往巡歷四門警覺軍衆令不睡眠爾時摩賀曩摩領其人衆巡至東門而即問言何人在此不睡守護時淨飯王告言我今在此躬自防衛摩賀曩摩告言大王若不睡眠無諸過失時摩賀曩摩即說偈言

耽睡人如死 亦如魔魅人 若能止其睡
過咎必不生

爾時摩賀曩摩說此偈已即往南門而復問言此有何人不睡守護時斛飯王告言我今在此專心防衛摩賀曩摩告言大王若不睡

眠無諸過失時摩訶曩摩即說偈言

人睡亦如死 須知有睡魔 若能止得睡

過咎必不生

爾時摩訶曩摩說此偈已即往西門而復問

言此有何人不睡守護時白飯王告言我今

在此專心防衛摩訶曩摩告言大王若不睡

眠無諸過失時摩訶曩摩即說偈言

耽睡如飲酒 醉入於曠野 過失即隨生

是故須止睡

眾許摩訶帝經卷第四

音釋

餒餒罪切 瑩瑩定切 轂轂所切 輻輻六切

跟跟古切 奩奩離切 婉婉委切 睫睫即切

也也足切 齒齒戶切 闕闕於切 眴眴目切

也也毛切 齒齒戶切 闕闕於切 眴眴目切

也也目切 眴眴目切 眴眴目切 眴眴目切

居又切
馬舍也

衆許摩訶帝經卷第五

第六
同卷

命四

宋西天經三藏翻大失試鴻臚少卿明教大師法賢奉 譯

爾時摩賀曩摩說此偈已即往北門高聲問
言此有何人不睡守護甘露飯王言我於此
處不睡守護摩賀曩摩言若不睡守護無諸
過失而說偈言

命四

怖睡如山嶮 亦如汎河海 一心防難危

止睡亦如是

時摩賀曩摩說此偈已即往市肆街巷處處
巡行覺察衆人止睡守護而說偈言

依法離非法 實言勿妄言 淨飯王最上

止睡令守護

時摩賀曩摩說此偈已天色將曉詣淨飯王
前而白王言過一晝夜內外安靜無諸魔難
唯願大王更勅軍衆用心守護過七晝夜令

彼太子定得輪王之位如是防護至六晝夜
時忉利天主觀太子意欲往道場而說偈言
善哉大丈夫 牟尼釋師子 必捨王宮殿
趣求山野處 圓滿六波羅 成就無上智
拔濟於群生 究竟至彼岸

爾時悉達多太子與諸宮嬪作於娛樂而忽
思惟我今雖有耶輸陀羅娛閑迦蜜里誡惹
如是夫人及六萬綵女若無男女便去修行
衆人俱言悉達多太子非是丈夫出別之後
即令耶輸身有懷妊由是太子爲諸宮嬪說
緣生幻有生死輪迴若不息心無有窮盡若
與女人同其牀座如足履火速得大苦是故
我今而生厭離作是語時有一妓女口吐涎
沫手足紛紜髮髻散亂迷悶倒地時諸宮人
驚怖異常太子見之深生傷悲歎言苦哉云

何有此死相不祥而說偈言

須臾變壞生惡相 手足紛紜涎沫流

觀此無常苦惱身 是故我今求解脫

爾時太子說此偈已觀諸衆生無有我人衆

生壽者堅實之相如入尸陀林無所愛樂如

履淤泥唯增臭惡如養毒蛇終無所益如電

如夢如沫如泡根本無明覆而不覺如是觀

已時淨飯王自說其四夢一夢滿月有其蝕

障二夢日出復於東沒三夢大人衆來禮拜

四夢自身笑而復哭耶輸陀羅亦說八夢一

夢上族離散二夢吉祥座破三夢腕釧損墜

四夢牙齒墮落五夢髻髮亂垂六夢吉祥雲

出於宮舍七夢滿月有其蝕障八夢日出未

高復於東沒即時太子復自思惟曾作五夢

一夢牀座如妙高山坐卧自在二夢兩手左

托東海右托西海復以二足垂南海中三夢

華果樹木及諸藥草長至天界四夢大身飛

禽其類甚衆形白頭黑及諸小鳥種種顏色

四方而來都至面前變爲一色而禮其足五

夢大石山上經行顧望太子自心思念我夢

如此定得捨俗證大菩提爾時耶輸陀羅思

前八夢告請太子占其吉凶太子曰一夢上

族離散宗姓團聚未始暫分二夢吉祥座破

座今如故三夢腕釧損墜見在汝臂四夢牙

齒墮落非有墮者五夢髻髮亂垂孰觀垂髮六

夢吉祥雲出宮夫爲吉祥我又在宮七夢月

有蝕障今在天上何有障耶八夢日出未高

復於東沒此時夜半日又未出所夢無惡汝

何憂疑太子思惟此之八夢當應是我出家

之兆即告耶輸陀羅我今當爲一切衆生往

彼山間志求涅槃解脫之法耶輸陀羅言如夫所志我亦隨往爾時帝釋天主及梵天王告太子言善哉善哉速捨五欲早出宮殿明相現前證一切智菩薩言憍尸迦我在深宮如虎入奔象馬車步四兵圍繞宮殿門戶並皆鎖閉處處懸鈴警覺守護云何而出帝釋告言但念過去無量阿僧祇劫所行行願爲斷衆苦度脫世間作是語時四大天等以威神力令彼衆人不能爲障即時帝釋化一寶階告般迦夜又主言聖者菩薩現處高樓汝以寶階於前迎接夜叉聞已依教奉行菩薩下之即覓餐那今鞍馬王尋見餐那正當眠睡而說偈言

善哉餐那汝速起 鞍我馬王迦蹉迦
乘入諸佛修行山 求證牟尼無上覺

說此偈已餐那從睡眠覺即起合掌告菩薩言事無倉卒何於夜半急要馬王欲乘遠去況此宮禁且無兵難賊難及水火之難云何如此菩薩言汝自昔來嘗奉驅馳云何於今而不相順餐那白言今當半夜真僞難分慮有不虞以招大罪菩薩聞已默然思念恐人知覺自往中廐時天主帝釋手執火炬引路前行至其廐門牽致馬王馬即驚駭雙足跑地是時菩薩舉萬字福相百千威德之手作無畏印摩馬王頂告言迦蹉迦與我有緣若能送我雪山之中諸佛行處證得無上菩提之果降大法雨普潤世間一切有情皆獲利樂汝福無量時迦蹉迦即受教旨身足不動爾時復有四大天子一名俱羅二名烏波俱羅三名波囉拏四名波囉拏舍縛帝此四天

子至菩薩前合掌恭敬告菩薩曰今知出外修菩薩行我等四天願欲隨從菩薩問言汝有力耶第一天子言所有大地之土可以負行第二天子言所有大海江河可以負行第三天子言所有一切山嶽可以負行第四天子言所有大地山嶽及河海等俱可負行而無疲困菩薩聞已即以神力移足躡地地大震動四大天子住立不能而各驚怪誰知菩薩有斯威力我等四天云何懺謝是時餐那見是神力即牽馬王詣菩薩前爾時大威德諸天及諸龍神傷愛別離於上空中啼泣下淚餐那言云何空中無雲下雨菩薩言此非降雨我將出外天龍傷別啼泣雨淚餐那聽受住立合掌菩薩即時深思佛身功德威儀利樂之法復思父母養育慈愛顧復之恩如

命四

五

不告辭有虧孝行作是念已即入殿內見淨飯王正當睡眠右繞一匝合掌啓白我於此時往雪山中求無上道度脫世間生老病死令諸衆生得大解脫言已而辭時有釋種摩賀曩摩瞻見太子戀慕憂惱悲泣涕淚云何因業輕捨王宮太子答言我爲利益一切衆生求成佛果摩賀曩摩白云王勅我輩長時警護無令太子暫出宮禁太子告言我於往昔發菩提心經三大阿僧祇劫歷修萬行求無上覺欲度衆生今此王宮非我所止摩賀曩摩聞是語時倍復憂惱涕淚悲泣發麤澀言苦哉苦哉我淨飯王所望不就致令太子棄捨深宮欲出遠行時耶輸陀羅聞是語已驚疑惶怖迷悶倒地良久乃穌告太子言緣何今日捨我而去娛閑迦蜜里識惹及諸宮

嬪悲淚前行告淨飯王太子無故欲離宮寢
往彼山野如鬼魅所著無以遮止唯王當嚴
勗勿令遽往王既聞已欲行誠勅帝釋梵王
與諸天子接迎菩薩即出城外菩薩右邊色
界天子善現威儀菩薩左邊欲界天子手執
幢幡有無數天樂導引前行有百千天子於
虛空中雨優鉢羅華俱母那華白蓮華及曼
陀羅華復雨沉香末香栴檀之香種種上妙
衣服復有天子歌舞作唱復有天子手捧馬
足瞻仰菩薩一心隨行俱吠囉等無量諸天
恭敬圍繞須臾之間至雪山中去迦毗羅城
一十二由旬爾時天主帝釋及大梵天王等
合掌白言我等諸天發精進心隨侍菩薩來
至山中若我菩薩成就阿耨多羅三藐三菩
提時願垂攝受度脫我等住立右邊一心瞻

中四

大

仰菩薩即時爲說偈言

我得最上道 一切佛行處 度脫於汝等

及彼諸有情

說此語已即脫寶冠上妙衣服告餐那曰將
我衣服及彼馬王歸奉父王若不證菩提誓
不迴也復說偈言

汝將馬王及寶衣 速歸本國迦毗羅

我住雪山修梵行 菩提未證而未歸

爾時菩薩說此偈已餐那聞之而復悲泣白
言今此山中多有虎狼師子諸惡禽獸菩薩
一身云何可止又此山野中皆有叢林荆棘
土石礮确菩薩旦暮云何經行菩薩言餐那
汝何愚迷衆生之身業惑所感四大和合性
相違反老病死苦如至身時非擇尊貴上族
富豪貧賤端正醜陋少壯老年冤親人我速

歸散壞俱受無常云何修行怖諸危難餐那
曰菩薩之行其義如是王或見我不見太子
必生憂惱如致大病其事云何菩薩言我今
出家行菩提分法布施持戒忍辱精進禪定
智慧成就十力四無所畏豈令父母得不吉
耶作是語已即從座起合掌頂禮舉手執劍
如優鉢羅華葉即自截髮擲虛空中天主帝
釋運大神力以手接髮與諸天子安忉利天
如法供養後有淨信婆羅門長者居士於此
山地起立塔廟爾時菩薩截髻髮已問餐那
曰汝意云何可能住此同修行不餐那曰王
族之意不令住此何敢固違菩薩即以萬字
福相百千威德之手摩迦蹉迦馬王頂授菩
提記令彼餐那歸迦毗羅城行七晝夜至二
更初到於城外園苑之中王勅宮人眷屬至

園迎接唯見馬王不見太子時宮嬪眷屬俱
向馬前抱馬王項高聲啼哭迦蹉迦馬聞是
哭聲心思太子悲淚傷痛經須臾間迴顧兩
邊即乃命終以宿因緣生六業婆羅門家利
根結薄聰明多智太子成佛之後即詣佛所
聞法悟道得無生忍爾時菩薩而復思惟我
今落髮作沙門相云何身上得袈裟衣如是
念已阿耨波摩城中有一長者眷屬熾盛財
富無量如毗沙門家有十子人相端嚴智慧
聰利俱樂出家淨修梵行因觀外境遷變無
恒成辟支迦父亡之後老母信重製一袈裟
施辟支迦子白母曰我當不久入於涅槃今
此袈裟我若受之無所使用去此不遠有淨
飯王子名悉達多不久得成阿耨多羅三藐
三菩提以此袈裟奉彼菩薩能令老母得大

果報說此語已運大神通於虛空中現其雲雷閃電風雨然後化火焚身入圓寂界是時老母臨將捨壽所持袈裟付與一女令奉菩薩此女忽然身得病患臨無常時安置樹上告樹神言以此袈裟與我奉彼淨飯王子悉達多時帝釋知是事已自變其身爲一獵士手携弓劍披此袈裟見太子來坐於路傍太子問曰汝是獵師云何身上有此僑尸迦衣細妙法服可以與我獵人告言唯此袈裟我非愛樂今欲與汝是服微妙恐人侵奪傷汝性命菩薩告言一切世間知我威力汝但施服勿懷憂慮帝釋天主即復本形頭面禮足乃以袈裟奉上菩薩受已即披與身不等帝釋見衣不等心自懷疑作是念時菩薩威神令其袈裟與身相等忉利諸天歸命供養婆

羅門長者於後彼處建立塔廟恒有苾芻往來禮拜爾時菩薩威儀具足漸次經行見一仙人名婆哩誡縛以手揩顙顏容不悅菩薩問言於意云何仙人荅言我此住處有多羅樹華果繁盛其味甘香忽然乾枯令我煩惱菩薩復問仙人住此本爲修行華果枯朽致愁悶耶仙人聞已心忽惺悟又見一菩薩色相端嚴瞻仰戀慕而復問言汝是出家菩薩不菩薩荅言汝見分明婆里誡縛即斷疑惑法眼開淨請菩薩坐而以華果如法供養經須臾間菩薩復問迦毗羅城去此遠近仙人荅言從茲至彼十二由旬菩薩思惟城邑不遙如釋種來必作魔難即別仙人過殍伽河往王舍城以自工巧採取樹葉作爲鉢器入城持鉢時民彌娑囉王在高樓上遙見菩薩

身相端嚴威儀寂靜體挂法服手持應器巡門乞食而興歎言王舍城中所住之人無有如是威儀色相今此苾芻當非庶人下族之類應是王種捨位出家滅除罪業修持淨命爾時菩薩持鉢出城往一山中以鉢置地端坐入定思惟民彌婆囉王見我發心必有異意作是念時王告大臣我於樓上見一苾芻身相端嚴威儀調順非是庶人下族所生汝當訪尋今在何處即時遣使往至山間見此苾芻安詳而坐國王知己躬自臨幸接見瞻仰心生歡喜因告言曰汝之身貌甚是端嚴若爲苾芻不相宜稱我有宮殿樓閣嬪妃美女最上富貴與汝受用勿作苾芻汝身何姓有何種族爲我宣說菩薩白言雪山相近有迦毗羅城我之父王姓刹帝利名曰淨飯王

理是國我須捨棄君父爲求菩提若是愚癡貪愛之人假使世間并四大海滿中珍寶猶尚不足譬如大火然於乾薪貪愛身心亦復如是大王我觀此物由如怨家亦如毒蛇一切憂惱怖畏根本大王假使大風而能吹動一切諸山於蘇迷盧終不能動假使世間所有珍寶最上資財國城妻子象馬僮僕而能惑亂一切人心而於我心終不能動唯涅槃解脫是真究竟爾時民彌婆囉王言汝今於此有何所求菩薩告言我求阿耨多羅三藐三菩提王言若成菩提願賜攝受菩薩答言如是如是王生歡喜復歸本處爾時菩薩往鷲峯山山側非遙而有仙人勤修梵行能以一足履地住經一日菩薩聞之亦以一足履地住經兩日仙人復以五熱炙身立經一日

菩薩於是立經兩日時彼仙人互相驚怪降
伏稱讚此是修行此是大沙門菩薩問言汝
等修行於何所求一云我求帝釋一云我求
梵王一云我求魔界之身爾時菩薩即自思
惟今此仙人所修之行皆是邪道非我所依
我今於此不求帝釋不求梵天不求魔界本
爲宿願利樂衆生求成佛果道旣非真宜應
捨彼

衆許摩訶帝經卷第五

衆許摩訶帝經卷第六

宋西天譯經三藏朝散大夫試鴻臚少卿明教大師法賢奉 譯

爾時菩薩即往阿羅拏迦羅摩處而學道法至已合掌擎拳致問汝宗行法其義云何阿羅拏迦羅摩曰我昔精進修習定慧至有想

命四

十一

天三摩地門皆悉通達汝何不知菩薩即時思惟羅摩所得智慧及有想天三摩地門真實不虛復自念言我於此法云何未得經剎那頃禪定智慧皆獲成就而告言曰汝宗行法今我已得時阿羅拏迦羅摩觀彼菩薩所得之法如實無謬尊重恭敬如自本師即以最上香華珍果一心供養菩薩復思今此行法而未究竟非爲正道即乃捨去往烏捺囉迦羅摩子處學修法行至已頂禮合掌問曰汝所得法是義云何時烏捺囉迦羅摩子言

我昔精進修習智慧至非非想處三摩地門久已證得汝何不知菩薩聞已即觀彼人所修智慧及非非想處三摩地門而無虛謬復自思惟我於此法云何未得作是念時俱獲成就即乃告言汝之法行我今亦得時烏捺囉迦羅摩子心未信許諦意觀察如實無謬崇重供養過於本師爾時菩薩又自思惟此之法行亦未究竟非真覺路速須捨彼別求明道時淨飯王臨御正殿憶念太子未知所止情懷憂惱近臣奏云離王舍城往烏捺囉迦羅摩子處單身介立勤求道法王既聞已心轉悲傷即遣親人三百往彼侍從時天指城酥鉢囉沒駄王亦遣二百人往彼侍從此五百人王已禮足圍繞瞻仰菩薩自念棄捨王宮居山寂靜結志修習求甘露滅今此人

衆晝夜煩雜而妨聖道唯留伯叔舅氏五人
餘遣迴國菩薩即時將此五人往謁耶仙人
聚落名烏嚕尾螺西曩野禰側近經行觀眺
習靜之處尼連河次見一林野地土平正樹
木幽閑如月清涼呼爲聖地告五人曰善男

令四

十二

子若人於此修諸梵行未證寂滅不久證得
我今依止求無上道即於樹下結跏趺坐學
修禪觀閉口齧齒舌拄上腭收攝心神如手
握物經良久間毛孔出汗精進不退念定相
應專注一心引發無漏而不現行復修別觀
跏趺而坐合口閉目舌拄上腭屏住氣息令
不出入良久之間氣逼頭頂疼痛至甚如錐
刺腦受斯大苦心不顛倒亦不散亂堅固精
進念定現前專注一心引發無漏而不現行
如是息氣漸次運動從頭頂下至兩耳門痛

楚復增如地獄苦菩薩爾時心不顛倒亦無
散亂策勤猛利念定現前一心專注引發無
漏亦未現行又復閉息外忘視聽氣積臍臍
脹滿徧身苦惱至極無以方比菩薩爾時心
不顛倒亦不散亂堅進修習念定現前專注
一心引發無漏而不現行如是修已又自思
念我於今後斷絕飲食時有天子遙已觀知
告菩薩言我此色身毛孔之內而有天上細
妙珍食堪充供養菩薩告曰如我所食本非
葷辛食出汝身亦非清淨若令我食必墮地
獄天子但以隨方所有或米或苴聽汝豐儉
以作供獻我即受之天子奉教以穀爲膳菩
薩食已身體羸瘦顏容憔悴心無苦惱亦無
退失發精進意念定現前專注一心引發無
漏亦未現行又節所食身轉羸惡兩目深陷

令四

十三

如井現星菩薩爾時心無苦惱亦無退失發精進意念定現前專注一心引發無漏亦不現行又於所食減令極少或一荳一麻一米一麥如是食已身力轉乏若行若步一起一倒爾時菩薩精進無退念定現前專注一心引發無漏亦不現行而復思惟此行非真未至究竟作是念時有三天子詣菩薩前見其形容困憊變異各述菩薩顏貌不同或言黑色或紫綠者菩薩聞已復自思惟我於此方如是勤苦容色變異終無所獲若求正覺何在節食正見相應取捨能忘是正菩提是真究竟譬如濕柴體雖滋潤若遇火然必生熾燄又如婆羅門家雖行欲心無所著亦得解脫我今亦爾若依正法行無所著必證菩提時淨飯王知彼太子在山野中精勤苦行日

食麻麥求無上道涕淚悲泣心懷痛惱與酥鉢囉沒駄王各遣二百五十人侍衛給使時耶輸陀羅忽然懷妊王即告諭宮人眷屬自今而往不得說言太子在山苦行之事慮彼傷惱損動腹子爾時菩薩往尸陀林中右脅枕屍累足而卧思想世間有爲生滅如蟻循環無有窮盡思已復坐入三摩地時有童男童女而來林下瞻見菩薩閉目不動手執柴枝穿菩薩耳兩邊通過俱作是言此塵土鬼不得親近即以砂石瓦礫擲菩薩身而各捨去經須臾間出三摩地正念現前身心不動又自思惟今此所作亦非正行於無上道而不相應憶念昔日爲太子時暫出王宮往瞻部樹下入三摩地彼處清淨遠離罪垢無諸穢惡出生善根於彼修行必圓道果作是念

已即便舉身欲在前行氣力羸劣而不能起
即取飲饌并湯藥等節次服食仍以香油塗
其身體澡浴眠寢安適身心增長勢力時彼
五人而相謂曰昔者太子捨輪王位出迦毗
羅城入山野中久茲苦行道果將就節志不
堅何期於今恣情飲食香油塗體澡身安寢
如是虧喪云何出離我等於此虛捐其功聞
波羅柰國有鹿野苑羅漢聖衆恒住其中宜
往彼處各求明道爾時菩薩浴尼連河水體
羸力弱舉步攸艱岸樹垂枝攀而得出即往
西曩野你聚落之所其聚落內有二童女一
名難那二名難那末羅身色端正心性慈善
頃聞太子在雪山下婆伽羅底河邊迦毗羅
仙人處學修梵行具三十二相福德莊嚴深
心悅慕願爲匹偶布施修福求遂所願爾時

命四

十五

童女聞尼連河側有苦行仙人遂發動誠欲
施乳粥即以千牛分爲兩群犖五百牛乳飲
彼五百牛復以五百分爲兩群犖二百五十
牛乳飲二百五十牛如是分飲至八頭牛復
犖八牛之乳最爲濃厚用玻璃器煮乳糜粥
於乳糜上現莎惹帝迦萬字千輻輪相時有
一人見此輪相而自思念若人得食速證無
上菩提之果即告童女我今飢渴當以糜粥
而施於我童女白言吾作此食施苦行仙人
非汝可取時天主帝釋即自化身爲婆羅門
住立女前女以乳粥欲布施與婆羅門曰我
不敢受有世主大人宜應供養童女復問世
主何人婆羅門言去此匪遙有大梵王童女
承言即詣彼處以粥奉施大梵王曰我不敢
受有淨光天子最上殊勝汝宜供養女復往

彼以粥布施淨光天子言我不敢受有一菩薩浴尼連河身乏氣力以手攀樹出河岸上被袈裟衣將成佛果若能供養得大勝利童女聞已即時馳往以鉢盛粥虔心上獻菩薩默然而受其供養已擲鉢入尼連河龍王至前欲取鉢帝釋化身爲金翅鳥龍即驚退帝釋得鉢安忉利天建塔供養爾時菩薩問二童女施此乳糜有何所求童女答曰我聞雪山相近婆伽羅河側迦毗羅仙人住處有淨飯王童子身相端嚴當作輪王欲求爲夫菩薩告言彼童子者夙修梵行離欲清淨名一切義成不久之間當得菩提云何與汝而爲夫耶童女聞已默然住立菩薩舉身登一石山峭峻孤拔林樹甚衆於此安坐未逾時刻山即摧毀菩薩驚怪茲何業緣時淨光天

命四

十六

子白菩薩曰萬行今圓四智將就此地薄祐而不能勝去此不遠有金剛座三世如來成正覺處菩薩即往天人引前足下生蓮海水泛潮大地震響聲如扣鐘菩薩徐行至一大窟內有黑龍昔無兩目聞地震海潮即時出窟雙眼頓明得見菩薩身相端嚴光逾聚日龍大歡喜瞻視戀仰而說偈言

地震海潮俱作聲 我今聞速離宮殿

忽得光明見如來 一心瞻仰生歡喜

爾時龍王告菩薩言憶念昔時有佛出世時

我兩眼俱得光明見彼世尊今亦是復得

眼開見佛身相即說偈言

我昔承佛大威德 令我得覩相好身

必遇牟尼覺道成 見佛端正亦如是

爾時菩薩欲至金剛座先舉右足行如牛王

身若寶山袈裟不動心等虛空面如滿月金光照耀蘊大法藥靈禽異獸右旋隨轉有如是等十種祥瑞菩薩思念以吉祥草鋪金剛座天主帝釋即現化身往香醉山取吉祥草其草柔軟如兜羅綿詣菩提樹前陳金剛座

命四

十七

上爾時菩薩舉相好身登金剛座結跏趺坐而發誓言我不起此座直至漏盡正意繫心入三摩地時魔宮中有二種旗一名喜相二名疑相動有所表時疑相旗忽然搖動魔見驚疑慮有不吉即作觀想知淨飯王子悉達多坐金剛座求無上覺時魔波旬生嫉妬心變身為人詐作淨飯王書至菩薩前致敬問訊云何住此久不歸還提婆達多入太子宮恣行非法及殺釋種菩薩初聞生三種不善尋思姪欲親里殺害及起瞋恚知魔所作復

成三善一離欲二不殺三無瞋魔復問言云何坐此菩提樹下佛言我求無上智魔言無上之智汝何得之佛言汝是魔罪之人設一婆羅門供尚得自在報應我經三大阿僧祇劫捨無數百千那由他俱胝頭目髓腦國城妻子金銀珍寶利益衆生求無上智云何不得魔言我設一婆羅門會得富貴自在汝能與我為證汝經三大阿僧祇劫捨頭目髓腦等利益衆生求無上智誰證於汝爾時世尊於金剛座上即展右手金剛莎帝迦萬字網鞞之相作無畏印觸地面上告言為我證明時地天神從地涌出合掌唱言魔王我佛往昔經三大阿僧祇劫捨無數百千那由他俱胝頭目髓腦國城妻子金銀珍寶利益衆生求無上智真實不虛汝魔勿疑魔王聞已心

懷驚怖默自思念若令菩薩成道侵我境界
奪我威光旋歸天宮別作魔計即化三女端
正莊嚴來於佛前窈窕逶迤詐爲瞻仰而欲
魔魅佛以神力變成老母髮白面皺陋惡尪
羸以鏡照之慚被而退魔王見已恨事不成

命四

十八

心生熱惱即時統領三十六俱胝鬼魅兵將
身披鎧甲手執槍劍及弓弩索種種器仗
復集毒龍猛獸象馬水牛虎狼野干等奔聚
同行又於空中現雲雷電閃霹靂風雹四面
一時逼惱侵害佛眼視之愍彼愚迷入慈心
定即時淨光天子於虛空中變大傘蓋覆徧
空中遮止風雹刀劍弓箭種種器仗俱作天
華所謂優鉢羅華鉢納摩華俱母那華奔荼
利迦華繞金剛座如供養佛即於三摩地運
神通力合多成一以一爲多上虛空中行住

坐卧身上出水身下出火履水如地等種種
神變已復觀彼衆布捺誡囉邪見疑惑貪欲
瞋恚愚癡等及彼有情離欲著欲有想無想
等引近分解脫非解脫如是等法通達明了
以宿命通觀魔等有情過去父母一生二生
百生千生乃至增劫減劫無數之劫世界國
土族姓眷屬富貴貧賤長壽短壽命終生處
無不證知以天眼通觀魔等有情未來諸趣
生死因果及身語意等善不善業受報好醜
究竟明了又復思惟欲界色界無色界苦集
滅道四諦行相若染若淨分別俱生根隨諸
惑如是思已無漏智觀速得現前見修二道
頓捨不生成無上覺爾時魔衆即皆退散復
告淨飯王曰悉達多太子於金剛座上而得
無常王既聞已與諸眷屬悲啼懊惱迷悶倒

命四

十九

衆許摩訶帝經卷第七

第八同卷

命五

宋西天譯經三藏朝散大夫試鴻臚少卿明教大師法賢奉詔譯

爾時有二梵天子住自梵界而作是念今南瞻部洲有佛世尊於烏嚕尾羅池側尼連河邊菩提樹下成等正覺彼佛世尊而於樹下

命五

結跏趺坐於七晝夜入於火界時二梵天互相謂言我等天人亦有大力如展臂頃能到於彼我等今者宜速往彼以妙伽陀而伸讚請於是二天從彼梵界速至佛所旋遶瞻仰禮重畢已住立佛前時一天子先以伽陀而

讚請曰

願佛起道樹 救度衆生界 爲說最上法 令得智法寶

第二天子亦說伽陀而讚請曰

佛面如滿月 心淨煩惱除 願說甘露法

行安樂世間

二梵天子說是伽陀讚請佛已隱而不現

爾時世尊出彼禪定觀諸世間說伽陀曰

世間所有諸欲樂 乃至天上所有樂

若比斷貪之大樂 十六分之不及一

復說伽陀曰

擔世苦重擔 迷苦而不捨 若捨苦重擔

能擔最上樂

復說伽陀曰

能斷世間一切愛 一切煩惱自除滅

知煩惱者脫輪迴 當得解脫之快樂

爾時世尊於七晝夜跏趺而坐入於禪定當

爾之際亦無有人持食供養纔說偈已忽有

商主名布薩婆梨迦將五百兩車載諸寶貨

欲往他國經過近地時布薩婆梨迦以宿善

根力常起思念云何令我獲得善友及妙眷
屬忽聞人言世尊入定七日不飲不食作是
念言今佛世尊在烏嚕尾羅池側尼連河邊
菩提樹下經七晝夜不飲不食而入禪定得
解脫樂成等正覺此我善友當爲我益我今
宜速詣彼奉食作最上供養發是心已時有
天人以天報通聞知布薩婆梨迦發如是心
乃觀照布薩婆梨迦及一切所將車乘等已
乃先白佛言今商主布薩婆梨迦聞佛在此
得解脫樂成等正覺於菩提樹下跏趺而坐
入於禪定經七晝夜不飲不食彼人定來獻
食供養希望果報求大安樂及利益故作是
語已隱而不見於是布薩婆梨迦與同行親
友自手辦造種種飲食美妙香潔品味成已
即專注虔誠持以奉佛未至佛所復作斯念

我今奉食爲最上供養如來必當演說最上
之法而使我等以獻食因得天樂果作是念
已尋至佛所即用頭面禮如來足禮已起立
瞻仰而住時布薩婆梨迦白佛言世尊我與
親友辦種種飲食而來供養願佛慈愍唯垂
納受爾時世尊許而未受何以故佛初成道
未有應器作是思惟我若不以應器受斯供
養者彼外道天魔必生毀謗作如是言豈有
過去正等正覺爲利益衆生故如是受其供
養耶佛作念時彼梵天子白佛言世尊過去
正等正覺爲利益衆生故皆持應器而受檀
施飲食供養於是世尊思欲應器彼四大天
王即知佛意乃各於自天令其妙工選取寶
石於少時間造成應器清淨瑩徹殊妙無比
時四天王造成鉢已各各自持同來奉獻至

佛所已即以頭面禮世尊足禮已瞻仰住立一面爾時四大天王異口同聲白世尊言我等今者各以寶石造得應器同來奉上唯願世尊哀愍納受作是語已顯聽佛旨爾時世尊復自思惟今此四王各獻一鉢我若受一三天不喜我若受三一天生惱我今等受四天之鉢既受鉢已又復思惟用唯一器四鉢孰先即以神力合四爲一四器雖合楞際疊存於是世尊爲利生故即持此鉢於布薩婆梨迦處受所施食既納受已即謂布薩婆梨迦曰我今爲汝演說三歸汝當諦受時布薩婆梨迦奉教而住世尊曰歸依佛歸依法歸依未來僧伽此是三歸盡汝形壽不得違誨時布薩婆梨迦白佛言我今歸依佛歸依法歸依未來僧伽盡此形壽不敢違誨爾時世

尊謂布薩婆梨迦曰隨喜布施感果不虛汝自捨施定獲快樂所求福報依願皆得亦復當證最上寂靜布薩婆梨迦若行布施所作福利人天及魔不能迷惑乃至禪定智慧若能盡行能竭苦源見前證聖是時布薩婆梨迦聞是說已心意快然歡喜踊躍願於未來世中憶念受持亦不忘失作是語已禮佛而退爾時世尊受得商王布薩婆梨迦所施之食即持往彼尼連河邊即於岸上敷草而坐契所受食食既畢已又復盥漱如是之際忽覺體中而發風病何以故佛出世間示斯爲緣欲令衆生知身如幻故是時天魔恐佛出世教化衆生出離三界當空我境常伺其隙欲來惑亂忽知發疾速離天界來至佛所而作是言善逝汝今不安涅槃時至我今請佛

入大涅槃爾時世尊知是魔來欲亂我心佛
謂魔言我涅槃未至我今直待聲聞弟子解
佛法分智慧明達了知教本廣演法相乃至
苾芻苾芻尼優婆塞優婆夷等修持梵行有
衆多人欲周天地及彼天人皆證解脫我於
是時方入涅槃時彼天魔聞佛語已知不涅
槃心生懊惱於是天魔慙恥而退爾時帝釋
天主遙知世尊體發風病自天而下至瞻部
洲去菩提樹不近不遠有大訶梨勒林於中
而住於此林中取得上好訶梨勒已疾往佛
所到佛所已頭面著地禮世尊足禮已瞻仰
住立一面白言世尊我知聖體小有風病此
瞻部洲有訶梨勒色妙馨香可療斯恙我今
持來奉上世尊唯願大慈納受而食世尊受
已尋便服食風病即除體安如故世尊慰勞

命五

五

帝釋乃退還歸天宮爾時世尊又復離菩提
樹往彼母啣鱗那龍王宮到彼宮已於一樹
下跏趺而坐入於禪定是時彼處七日七夜
降霍大雨時母啣鱗那龍王以雨方霑知佛
在定恐其風雨之氣互侵佛身又恐蚊蚋蝱
蠅咬擾聖體遂以自身纏繞七帀叩首上覆
如傘蓋相經七晝夜不動不搖佛將出定龍
自攝身龍王還宮復以種種華鬘塗香嚴飾
其身來至佛所頂禮佛足白言世尊七日已
來風雨之氣蚊蚋之類侵擾以否聖體云何
於是世尊說伽陀曰
觀察於世間 一切衆生等 若得無侵害
歡喜復快樂 離欲斷煩惱 此樂難比喻
無明若調伏 斯爲最上樂
爾時世尊說是伽陀荅龍王已即離彼處還

來菩提樹下結跏趺坐經七晝夜入定觀察
十二緣生云何根本而因得生所謂因於無
明乃緣於行行緣識識緣名色名色緣六入
六入緣觸觸緣受受緣愛愛緣取取緣有有
緣生生緣老死憂悲苦惱由如是因得一大
苦蘊集如是根本不生則一切得滅所謂無
明滅即行滅行滅即識滅識滅即名色滅名
色滅即六入滅六入滅即觸滅觸滅即受滅
受滅即愛滅愛滅即取滅取滅即有滅有滅
即生滅生滅即老死憂悲苦惱滅解如是滅
則得一大苦蘊滅爾時世尊於七晝夜在於
禪定如是觀察十二緣生已乃出三摩地而
說伽陀曰

淨行觀察苦相時 知一一法有所因
若知苦相之不生 自然一切所愛斷

命五

六

淨行觀察滅受時 知滅受法之無盡
若知滅受之不生 自然一切所愛斷
淨行觀察緣生時 乃知緣生法無盡
若知緣生之不生 自然一切所愛斷
淨行觀察有漏時 乃知有漏法無盡
若知有漏法不生 自然一切所愛斷
淨行觀察如是法 知如是法悉無生
如日徧照於世間 行住虛空無所礙
淨行觀察於苦相 知一一苦悉無生
破壞煩惱得無餘 如佛降伏魔羅軍
爾時世尊說伽陀已復說是言若有衆生斷
於輪迴知甚深法微妙言辭悉能通解如是
之人是有智者我爲此等人說我令此等人
知我今如是獨處林野依相應行見行法樂
是時世尊說是語已自在行住無諸繫著不

云說法亦不生心是時娑婆世界主大梵天王知於世尊不云說法亦不生心而作斯念若如是者世間滅壞何以故如來應正等覺出於世間如優曇鉢華時乃一現今不說法自取法樂當令一切有貪欲者樂邪法者不覺不悟云何世間而不滅壞我今往彼伸其勸請是時梵王娑婆世界主離彼梵界如展臂頃即至佛所住立佛前說伽陀曰
出世摩伽國 過去法無垢 悉開甘露門 演法濟衆生

世尊告言我法甚深難見難了我若輒說速取滅壞何以故世間一切樂邪法者有貪欲者不樂聽受不能覺悟何以故貪欲之者黑闇覆障故梵王白言世尊衆生者世間生世間老有利根鈍根及以中根乃至相好易化

塵垢輕微諸異生等世尊譬如青蓮華或白蓮華等生於水中於水而長於水而老其中或有出水者或不出水者亦復如是世尊諸異生等若不爲說種種妙法皆趣沉墜唯願善逝賜其法寶唯願善逝降於甘露爾時世尊受於梵王殷勤勸請已默而許之遂以佛眼審諦觀察世間衆生世間生世間老鈍根者利根者乃至於中下顏貌之好醜易化與難化少塵極少塵如是衆生等我若不爲說種種之妙法不知諸苦本悉趣於沉墜世尊如是觀察知已而起大悲將演妙法先說偈言

我今降法甘露雨 當潤樂聞及一切
從此人間得法因 若見弊魔不廣說
是時梵王娑婆世界主聞此偈已定知世尊

演說妙法身心快樂喜不自勝即以頭面禮
世尊足右繞三匝隱沒而退爾時世尊即自
思惟今者何人先得聞法乃憶往昔阿囉拏
迦羅摩等仙人可先聞法何以故我於往昔
過彼住處受其妙供及受其囑我今先為彼
人說法作是念時乃有天人來白佛言彼阿
囉拏迦羅摩等皆已命終方今七日世尊默
知又聞天告乃嗟歎曰無常大事世不驚乎
又念阿囉拏迦羅摩等薄祐如是不聞正法
耶爾時世尊復念何人可先聞法彼嚕捺囉
迦羅摩子亦曾供我亦曾囑我作是念次彼
有天人名曰囉吒又告佛曰彼嚕捺囉迦羅
摩子亦趣無常世尊默知復聞天告世尊又
歎曰正法難聞薄祐乃爾於是世尊思念五
人我出王宮入山苦行是等尋求供侍於我

我應先為彼人說法於是以淨天眼觀在何
處見彼五人在波羅柰國鹿野苑中於是世
尊自菩提樹往波羅柰國鹿野之苑時於路
次有一仙人名烏波誡相逆而來時彼仙人
忽於路次得見世尊又見身丈六金色晃然
相好端嚴殊特超世驚歎良久乃作是言瞿
曇瞿曇觀汝相好湛然清淨復如金色非世
所同何因出家歸依何法誰為汝師今復何
去爾時世尊乃說伽陀荅仙人曰
我今無所師命五處世獨無侶九悟正等菩提
為最天人師命五知世間諸法九不滌亦不斷
具一切智力當降魔羅軍
烏波誡仙人言瞿曇實如汝言是佛無疑佛
言如是了知及得漏盡降伏罪業故號為佛
時烏波誡仙人又復問言瞿曇今往何處佛

言往波羅柰國擊大法鼓轉大法輪當說世間未曾有說亦復宣示過去佛勅當令世間知法離欲佛說是已彼烏波誡仙人頂禮世尊隨路而去爾時世尊即自往彼波羅柰國鹿野之苑時彼五人其名灑替梨迦摩斛梨迦末斛羅唵嚩鉢囉賀拏尾婆囉多等方新澡沐香油塗身廣排飲饌列坐食次彼五人等遙見世尊知非他人皆大驚怪互相議曰今此太子居山苦行欲成佛道今乃退志還尋我等我等安坐勿得迎侍世尊遙知默而行詣佛身巍巍由如金山尊貴吉祥相好具足有大威德無能儔匹時五人等見佛俯近威德加臨無能安坐皆起迎侍於是五人咸言善來請當就坐是時五人或爲佛敷座者或汲水洗足者或奉上名衣者或接手扶侍

者於是五人承事於佛同於往昔是時世尊安詳就坐從容而言謂五人曰汝等五人初見我時共有要議欲輕於我汝等甚愚汝等皆是我族當行我戒是時世尊復告五人曰汝等莫於如來生起輕慢何以故汝等若於如來起於輕慢者得無利益後於長夜獲大苦惱五人白言佛於昔時所有威儀最上世法殊妙之事後行苦行得最勝清淨無上之智通達妙法本所觸行今在何處佛言汝灑替梨迦末斛梨迦末斛羅唵嚩鉢囉賀拏尾婆囉多等若於衆生廣大供養廣大之施上妙飲食酥乳之味食畢沐浴香油塗身潔淨諸根嚴好殊麗前後顧視容色適悅汝等如是爲見我者非見於我灑替梨迦等言如是如是時彼五人常行乞食世尊到已或三人

乞食二人奉事或二人乞食三人奉事互爲給侍精進無懈佛因制之曰有二事法修行之人而不得行云何二事爲於色欲生貪此輪迴根非上人法若有人能自正其心修其苦行於此五蘊三毒如是諸法無迷無執智眼觀察斷彼輪迴離於苦樂行於中道復於正見正思惟正語正業正命正勤正念正定於此八正而廣修習獲於神通證於涅槃得名中道當趣無上正等正覺我於是事悉辦無餘爾時世尊如是說已又復觀知五人堪能受法即復告曰此是苦汝須知於是五人思惟以慧眼觀是法於過去世曾所聞聽菩提發生而得了知又復告曰此是集汝應斷於是五人復思是法以慧眼觀於過去世曾所聽聞菩提發生而得了知又復告曰此是

命五

十二

滅汝應證於是五人又復思惟以慧眼觀此法過去已曾聞聽菩提發生還得了知又復告曰此是道汝應修於是五人又復思惟以慧眼觀察此法亦於過去之世曾所聞聽菩提發生還得了知爾時世尊又告五人曰苦法我已知集法我已斷滅法我已證道法我已修我以是法乃成佛道爾時世尊又告五人曰汝等可應學吾知於苦斷於集證於滅修其道汝等若能於此四諦真實之道而得了覺自然知彼無集無解無明無慧無菩提無不生乃至梵界魔界諸天世人沙門婆羅門等亦無所住離顛倒想心意快然當來決證無上正等正覺爾時世尊如是三轉十二行法輪時尊者鉤提等除去塵垢得法眼淨及彼八萬天人得法眼淨於是五人既悟道

已乃白佛言我等欲於佛法出家願賜聽許
爾時如來謂五人曰善來苾芻於是五人鬚
髮自落袈裟著身成沙門形爾時世尊復謂
鉤拏等言色是常是無常是苦是非苦是空
是非空是有我是無我受想行識是常是無
常是苦是非苦是空是不空是有我是無我
鉤拏荅言世尊我觀色受想行識皆是無常
苦空無我之法爾時五苾芻聞佛說是五蘊
之法乃得漏盡證於無學時佛謂言汝等所
作已辦梵行已立我生已滅永斷輪迴我與
汝等六人當爲世間第一福田三寶之名今
已具足爾時世尊說是法時有一夜叉名曰
苦摩高聲唱言今日世尊於波羅柰國鹿野
苑中仙人住處三轉四諦十二行法輪爲愍
念利益世出世間梵魔天人沙門婆羅門等

命五

十二

時彼苦摩夜叉作是唱已彼四大王天三十
三天及彼諸天互相告唱須臾之間乃至梵
界諸梵天等皆悉聞知世尊在彼波羅柰國
鹿野苑中仙人住處三轉法輪三寶出現利
樂人天及諸有情是時地即大動天亦大明
於是梵王帝釋及諸天等各各執持寶幢幡
蓋來詣佛所雨天妙花作天妓樂歌頌讚嘆
種種供養歡喜踊躍禮佛而退

衆許摩訶帝經卷第七

衆許摩訶帝經卷第八

宋西天譯經三藏朝教大天試鴻臚少卿明教大師法賢奉 詔譯

爾時世尊初轉法輪度五苾芻已將諸苾芻
往嚩囉迦河岸遊止暫住時波羅柰國中有
俱梨迦長者子名曰耶舍家中巨富廣有財
寶母氏眷屬皆國中豪族多畜奴婢互誇強
盛是奴婢輩皆悉年少聰明多藝復擅歌樂
常侍左右時長者子耶舍忽於一日在自家
中令諸妓人嚴容麗服鼓動音樂與諸眷屬
恣其快樂自旦至夜方始停息時妓女輩各
還所止以其困乏睡極昏重無所驚覺時長
者子耶舍於夜後分巡諸房室檢察庫藏見
諸妓女門不掩閉身無拘檢或髮髻蓬亂或
衣服離身仰覆縱橫現露形體猶如死人一
無異別時長者子耶舍因果成熟出家時至

覩斯相狀忽生厭離猶如發狂耶舍以其富
盛有摩尼所莊之履數及千緡於是著實莊
履夜詣王宮告守門者曰我苦我苦請報於
王其守門者不肯聞報復詣後門亦謂守門
者曰我苦我苦請報於王其守門者亦又不
聽是時耶舍自夜後分直至天曉乃出城門
至嚩囉迦河岸往來而行口中但言我苦我
苦爾時世尊在於彼岸晨旦經行於是耶舍
遙見世尊威德端嚴無與等者知非常人乃
告之曰聖者我苦聖者我苦爾時世尊即以
軟言而慰呼之善男子汝來我今此處安樂
無事時彼耶舍得聞世尊慈悲之聲軟言相
呼即脫寶履致於岸側渡嚩囉河詣於佛所
頂禮佛足却住一面於是世尊乃與耶舍同
還遊止敷座而坐即爲耶舍如應說法爾時

世尊謂耶舍曰布施持戒生天之因雖五欲自在輪迴未斷勿以天福心生喜樂汝今欲求割斷煩惱除去蓋障得解脫者當於聖道而加修習可證道跡可證涅槃又言耶舍我今問汝色是常是非常耶是苦非苦耶是空非空耶有我無我耶受想行識是常非常耶是苦非苦耶是空非空耶有我無我耶時彼耶舍得聞世尊說如是法譬如白色之衣易爲染著得離塵垢獲法眼淨於是世尊又爲廣說苦集滅道四聖諦法於是耶舍即於座上得漏盡意解證無學果便即發言答世尊命五曰如佛所說色受想行識者乃是無常苦空無我之法世尊知彼實已得證漏盡解脫猶著在家寶飾之衣乃爲耶舍說伽陀曰
若得正道猶戀莊嚴雖行梵行未名息心

若能調伏執杖自驚雖婆羅門是真沙門爾時耶舍宿有默慧又證無學纔聞佛說此妙伽陀乃自思惟世尊說此正爲於我猶著在家寶飾之衣乃白佛言世尊我今於佛法中願爲沙門世尊大慈惟見聽許佛言善來苾芻鬚髮自落袈裟著身成沙門形儀相具足時俱梨迦長者始及天曉見彼左右忽忽報言長者子耶舍不待天曉出自舍去今不見迴未委所至時俱梨迦長者聞是語已驚怪非常乃私自念我子夜出得非不正之人而相誘耶又問侍人我子所履所服爲常非常耶侍人對曰彼所常服妙衣寶履不在常處必著隨身是時俱梨迦長者又復思惟我子耶舍著寶莊履及上妙衣必無惡事我今宜速諸處尋覓於是令諸僮僕分頭尋覓兼命五
十五

自出城門至嚩囉迦河岸訪問尋求忽於岸邊見子所著寶莊之履又聞彼岸有佛及將弟子於彼遊止心自思惟我子決定在彼而住時俱梨迦長者即自脫履渡河訪覓將至佛所佛亦遙見知來尋子既至佛前覩佛光明又見異相未及言子唯即驚歎世尊方便承其發心乃先諭言善來長者得無疲勞且可就坐今與汝語時俱梨迦長者初覩世尊威光相好又蒙輒言慰諭但益瞻仰全忘覓子世尊告曰我有妙法汝樂聞耶俱梨迦長者言願佛哀愍唯垂宣示佛言布施持戒生天之因天之果報非爲究竟若斷煩惱可趣聖道俱梨迦長者我今問汝色是常非常耶是苦非苦耶是空非空耶有我無我耶又曰受想行識是常非常耶是苦非苦耶是空不

空耶有我無我耶爾時世尊廣爲解說汝可觀察實言報我時俱梨迦長者曰我今實知色受想行識乃是無常苦空無我之法爾時世尊又爲廣說四諦之法時俱梨迦長者因是除去塵垢得法眼淨身心適悅歡喜無量爾時世尊知彼長者心意開解恩愛淡薄若見其子作沙門相必無憂苦乃發問言俱梨迦汝何因緣來至於此俱梨迦長者具以上事告於世尊佛呼苾芻耶舍即出是時長者見耶舍出作沙門形復知漏盡證無學果乃作是言我子快哉初能自利又能利他使我得聞殊妙之法遠離塵垢法眼清淨皆由我子獲斯妙利於是俱梨迦復白佛言我今住家願佛垂戒佛言善哉善哉我今爲汝受於三歸汝當諦受佛言俱梨迦汝歸依佛歸依

法歸依僧伽汝盡形壽不得違悔俱梨迦言
我今歸依佛歸依法歸依僧伽佛言俱梨迦
汝今於吾受得三歸依竟當爲世間第一優
婆塞爾時俱梨迦蒙佛爲說種種之法乃得
遠塵離垢法眼清淨又蒙與受三自歸已心
意泰然歡喜無量即白佛言我於來日就自
居舍備齋供養唯願世尊及聖衆等慈悲愍
念同賜降赴佛即默然時俱梨迦知佛受請
歡喜踊躍旋遶三匝禮佛而退彼俱梨迦既
請佛已速至家中告彼妻子男女并諸眷屬
彼耶舍夜出渡嚩囉迦河投佛出家已作沙
門兼已得證阿羅漢果我尋耶舍亦到於彼
便蒙世尊爲我說法獲離塵垢得法眼淨又
爲我受三自歸法我已請佛來日供養佛與
聖衆必來降赴汝諸眷屬今當爲我速淨舍

宅香水灑地無令塵空及速備辦種種飲食
乃至香華供養之具汝等專至亦獲大利既
至來朝明相現已家內營辦一一皆畢俱梨
迦長者即於庭際執爐焚香遙白世尊飲食
已辦願佛垂降爾時世尊即告拘提諸羅漢
等可共往赴俱梨迦請又告耶舍命五曰汝歸本
家形服非舊母親眷屬心必悲惱汝今出家
已證無學宜以方便化令歡喜佛誡勅已即
與同詣家中受食時俱梨迦長者立於門首
顙望佛至佛既至門俱梨迦長者頂禮佛足
焚香迎引至第二門時耶舍母及乳母眷屬
悉出迎接初覩世尊相好端嚴威光殊異又
見耶舍及諸羅漢法服嚴身威儀詳審凡諸
進止有殊異道圍繞瞻仰歡喜無極俱梨迦
長者請佛就坐諸羅漢等亦復就座是時長

者與諸眷屬次第禮足禮畢瞻仰各住一面爾時世尊爲耶舍母及諸眷屬如應說法使其歡喜又令發起菩提之心乃告之曰布施持戒得生天上雖復快樂未出輪迴欲出輪迴當斷煩惱於生滅法而須了知汝等諦聽深心思惟我今爲汝分別廣說佛言色是無常是苦是空是無我法又言受想行識是無常是苦是空是無我法汝等知否如是世尊廣爲分別時耶舍母及乳母等皆已宿植善本今遇世尊爲說妙法如潔白衣染成衆色隨其所染皆得鮮妙耶舍母等亦復如是世尊乃至廣爲演說苦集滅道四聖諦法耶舍母等不起於座得法眼淨斷除貪愛離諸疑惑而於諸法知見無礙即從座起住立佛前白言世尊五蘊三毒苦空無我無常之法我

已實知爾時世尊即爲受其三歸受三歸竟歡喜踊躍禮謝於佛而又白言食時已至佛即默然於是長者及耶舍母悉持所辦上妙香美種種飲食自手奉上佛及聖衆佛與聖衆食畢澡盥清淨已竟是時長者及耶舍母命五即於佛前各坐卑座請佛說法佛即化利令心歡喜時俱梨迦長者與耶舍母等復白佛言我有少疑欲伸啓問願佛開說斷我等疑今我子耶舍當有何因而獲是果乃於家中忽發此心會遇世尊爲說妙法而得法服莊嚴其身獲諸漏盡證羅漢果爾時世尊告長者等言過去世時波羅奈國不近不遠有一仙人於彼而住有慈悲心利益衆生恒入城中持鉢乞食時彼仙人會於一日於四衢道見一死蟲觀其壞爛又復臭穢過往之者不

可瞻近彼仙忽起思念我身無常不異於此
遂於輪迴而生猒離當此之時有一童子亦
見死蟲同彼仙人猒輪迴苦而彼仙人及以
童子既猒輪迴後勤修習解脫正道彼仙人
者即我身是彼童子者即耶舍是是故耶舍
今遇於我得聞妙法證無學果於是俱梨迦
長者及諸眷屬聞佛說已歡喜信受禮謝而
退於是世尊將諸聖眾還歸鹿野仙人住處
爾時俱梨迦復有四子一名布囉努二名尾
摩羅三名誡鏐鉢帝四名蘇摩斛見彼耶舍
命五投佛出家證羅漢果咸作斯念我等云何猶
戀貪愛不求解脫又復思惟若今世間無最
上覺復有何人說最上法我等輪迴無能斷
絕今值佛法宜生正信當共捨家如彼耶舍
以求解脫於是布囉努等兄弟四人出波羅

柰國同詣佛所頂禮佛足却住一面而白佛
言我俱梨迦子耶舍之弟今來投佛欲爲沙
門唯願世尊慈愍聽許爾時世尊即令弟子
與剃鬚髮著袈裟衣既爲沙門又與說法佛
言布囉努汝爲沙門當行苦行攝心不亂求
真諦法令心無我而於諸法決定了知盡生
死源永斷輪轉以趣解脫時布囉努等聞佛
世尊說是法已正信決定精勤修習獲諸漏
盡得心解脫所作已作梵行已立我生已滅
永斷輪迴證羅漢果是時乃有十大阿羅漢
爾時波羅柰國中復有大族諸長者子正五
十人與俱梨迦子常爲朋友忽聞俱梨迦子
耶舍及布囉努等隨佛出家證於道果咸作
是念彼長者子耶舍及布囉努等種族尊勝
巨富難倫聰慧過人端嚴罕匹常受快樂無

諸苦惱猶能捨家學道以求解脫我等云何
猶顧戀耶諸長者子作是念已出波羅柰國
同詣佛所至佛所已頂禮佛足住立一面諸
長者子同白佛言我諸長者子正五十人今
欲於佛法出家而爲沙門願佛慈悲哀愍聽
許佛言善哉汝長者子捨家爲道今正是時
即令弟子與剃鬚髮著袈裟衣度爲沙門是
時世尊又與說法令求勝果佛言汝長者子
各各捨家爲沙門者當須一身行於苦行攝
心不亂求真諦法令心無我而於諸法決定
了知盡生死源永斷輪轉以趣解脫諸長者
子得聞世尊說是法已正信決定精勤修習
獲盡諸漏心得解脫所作已作梵行已立我
生已滅永斷輪迴悉皆證得阿羅漢果於是
世間始有六十大阿羅漢爾時世尊觀諸弟

子而告之曰我從無量劫來勤行精進乃於
今日得成正覺正爲一切衆生解諸繫縛汝
等今日悉於我處得聞正法漏盡解脫三明
六通皆已具足天上人間離其繫縛可與衆
生爲最福田宜行慈愍隨緣利樂所言未竟
時彼罪魔名摩拏嚩迦即便遙知今日瞿曇
沙門與諸弟子在鹿野苑中而共商議謂言
汝等天上人間得離繫縛宜各隨緣而行利
樂我今若不令其惑亂必定化盡世間衆生
時彼罪魔摩拏嚩迦自變其身同世間人如
展臂頃即至佛所住立佛前說伽陀曰
汝解脫相非解脫 得此解脫非沙門
汝今自處大繫縛 當欲解脫於何人
爾時世尊知是罪魔摩拏嚩迦來相惑亂徒
自作業何能壞我即說伽陀答罪魔曰

命五

三

我於天上及人間 已能解脫諸繫縛
乃至無學離繫縛 汝之罪魔不能破

時魔摩拏縛迦聞是語已即自思惟此瞿曇
沙門知他心事必不能亂唯自苦惱隱沒而
退爾時世尊告諸苾芻我已語汝汝等已於
天上人間離諸繫縛可愍念衆生而行化導
汝等速去時諸羅漢奉佛教勅禮辭而去爾
時世尊與諸羅漢皆離鹿苑適悅之地佛即
獨行往詣西曩野你聚落烏魯尾螺池邊迦
囉波娑林下經行宴坐時聚落中有六十賢
衆在西曩野你中將諸妓女及彼音樂日日
作樂無有停罷忽有一女於此快樂心生厭
離捨衆逃避不知所至時六十賢衆善根成
熟因尋此女入迦囉波娑林忽於樹下見佛
世尊驚訝非常互相謂曰今此沙門身如金

山光明晃耀面目端正諸相具足吉祥尊貴
無有倫匹嘆不能已即前行詣而發問言沙
門止此還曾見一女入來否佛言賢衆此處
寂靜非女所遊汝今來此爲尋女人何不自
爲尋其身耶是時賢衆聞佛所說即有省悟
乃知前非而答佛言我等先尋女人誠是過
咎今自尋身願垂指示佛言賢衆汝既如是
且可安坐我今爲汝宣說法要是賢衆等即
禮佛足退坐一面佛言賢衆布施持戒生天
之因雖復快樂非爲究竟若求出離當斷煩
惱亦復分別生滅之法時彼賢衆纔聞是說
蓋障即除心內思惟歡喜無量佛知其意即
爲廣說苦集滅道四聖諦法彼賢衆等如潔
白衣易染衆色隨彼所染皆得鮮好而賢衆
等即於座上證四聖諦微妙之理既於諸法

衆許摩訶帝經卷第八

鉤	儒	分	顥
切居侯	稅切	仰也	魚容切
兩力讓	蝱	蝱	盟
杖也	余陵切	音盲	漱
履	蠅	奏切	盟古玩
點	啞	切	切
慧下八切	入口答切	蕩口也	澡手也
鏤	也切	印	蚊
切忙范	舉也	音仰	蚋
			無蚊

衆許摩訶帝經卷第九第十同卷

命六

宋西天譯經三藏朝散大夫試鴻臚少卿明教大師法賢奉詔譯

爾時世尊度彼六十賢衆已復思何人先可受化乃憶西曩野你聚落之中有難那及長女并眷屬等堪先受化憶念我昔苦行去時經過彼舍時難那及長女并眷屬等共持乳粥及酥蜜等來獻於我今觀彼等根緣已熟堪可化度作是念已世尊翌日伺候食時執持應器入西曩野你聚落之中次第乞食至難那舍時彼難那及長女等見佛至門踊躍歡喜即謂佛曰善來世尊聖體安否世尊大慈暫過我舍佛即入門難那并女爲佛敷座世尊昇座彼難那及女并諸眷屬即以頭面禮佛雙足各各禮已退坐一面爾時世尊即爲說法佛言難那汝等諦聽布施持戒生天

之因雖感欲樂終當退失汝等當斷一切煩惱以求出離又復廣爲分別生滅之法而令了知佛說是時彼難那等根緣成熟蓋障即除深心思惟歡喜無量佛即又爲廣說苦集滅道四聖諦法時難那并女及眷屬等即於座上得法知見證四諦理斷諸疑惑貪愛永除一向信佛即從座起合掌頂禮白言世尊我於世尊所說諸法實得知見我今歸佛歸法歸依僧伽願爲近事永不殺生又白佛言食時已至願佛大慈受我供養佛即默然時彼難那并眷屬等見佛默然知已受請持種種香華飲食手自奉上世尊食畢澡漱已竟難那眷屬復處卑座樂欲聽法佛即方便種種說法難那眷屬復得聞法歡喜踊躍禮佛而退爾時世尊於西曩野你聚落化難那等

已即復思念欲詣摩伽陀國隨緣利樂時摩
伽陀國有善相師烏嚕尾螺迦葉壽年三百
歲自謂已得阿羅漢道居尼連河側弟子眷
屬有五百人摩伽陀國王及輔相一切民衆
皆尊重供養更無有上彼摩伽陀國有無量
人衆由如盲冥黑暗障蔽常依烏嚕尾螺以
爲引導彼諸人衆雖承化導無由出離我今
化彼烏嚕尾螺迦葉及彼人衆使見正道既
思惟已行詣摩伽陀國尼連河側烏嚕尾螺
迦葉住處時烏嚕尾螺迦葉忽見世尊來至
住處又見相好具足威德殊異即前迎接復
加恭敬而謂佛言善來大沙門先住何處今
忽至此即爲世尊敷座請坐世尊就坐彼烏
嚕尾螺迦葉亦自就坐即以種種言辭慰問
世尊世尊亦以種種方便開導教化談論未

竟日已西暮佛即告言今已日暮我於汝舍
有寂靜處欲寄一宿烏嚕尾螺迦葉白言大
沙門我諸房舍眷屬在中唯一靜處堪沙門
宿然此靜處毒龍在中雖不恡惜恐有所損
請自思之佛告烏嚕尾螺迦葉言但願見借
必無傷害烏嚕尾螺迦葉告言若能爾者當
自隨意於是世尊即詣龍舍佛於舍外自洗
足已便入龍舍自布淨草跏趺而坐佛即便
入三摩地時彼毒龍忽見世尊在舍中坐即
發嗔怒乃作煙霧徧舍內外於是世尊以神
通力亦化煙霧毒龍轉怒舍內火著佛以神
力亦化其火佛與毒龍二火俱熾時彼龍舍
周徧內外成大火聚火燄上騰明照遠近時
彼迦葉常於夜分出觀星象乃復觀見龍舍
成大火聚即便傷嘆苦哉苦哉彼端正沙門

不聽我語龍火熾盛百倍於常可惜沙門必被傷害時烏嚕尾螺迦葉及與眷屬皆見大火熾盛之相時彼毒龍知於世尊不能損害又以自身亦大疲乏乃息惡毒火便消滅世尊是時亦攝神力毒龍降伏收於鉢內天曉之後烏嚕尾螺迦葉與眷屬等行詣龍舍觀於沙門既到龍舍見佛端然而白佛言汝大沙門宿夜安否佛言我安汝大沙門鉢中何物佛言此舍之龍佛又告言汝言此舍有是毒龍人不敢止我今降伏收於鉢中汝可審觀了知其實烏嚕尾螺迦葉自以耆年德重行苦學優凡所見知無有過者及見世尊龍火不傷又能降置鉢內乃讚歎曰奇哉沙門有大威力我所見聞希有此事是大沙門是大丈夫亦是阿羅漢爾時世尊降毒龍已至

第二日即於烏嚕尾螺迦葉住處不遠就一樹下經行宴坐即於是夜有四大天王下來聽法時迦葉夜出觀於星象乃見佛前有四大火聚迦葉即謂諸弟子曰彼大沙門亦事於火諸弟子曰師何由知迦葉告言我夜觀星象乃見大沙門前有四大火聚我知沙門事火無疑時烏嚕尾螺迦葉纔至天曉速詣佛所而白佛言汝大沙門亦事火耶佛即報言我不事火迦葉又言我夜中觀星見沙門前有四大火聚若不事火此乃何用佛即報言此非是火是四大天王下來聽法^{命六}是彼四天王身光之耳迦葉驚曰奇哉沙門有是事也此大沙門有斯威德感得天王俱來聽法此亦是阿羅漢耶至第三日帝釋天主乃於夜分來至佛所頭面禮足退坐一面佛爲帝釋如

應說法帝釋天主得聞法已歡喜踊躍還歸
天宮時烏嚕尾螺迦葉夜觀星象又見樹下
世尊前面有一火聚極大熾盛光明照耀如
日初出而彼迦葉謂弟子曰而此沙門定事
於火至天曉已與諸弟子速詣佛所而白佛
言汝大沙門我昨夜出觀於星象又見火聚
熾於座前火光上騰如日初出我今定知沙
門事火佛即報言我非事火昨夜帝釋下來
聽法是彼身光之所照耀迦葉歎曰奇哉沙
門有大威德此實希有我今定知亦得阿羅
漢果至第四日烏嚕尾螺迦葉出門觀星又
復觀見沙門座前有大火聚光明照耀如日
正中是時迦葉還告弟子我於今夜又觀星
象復見沙門座前有火光明照耀轉倍於前
如日正中等無有異審察是相定事火也至

命六

五

天曉已行詣佛所而白佛言我夜觀星亦見
沙門座前有火我知沙門定事火也佛言迦
葉我無所求何用於火昨夜之中彼娑婆世
界主大梵天王下來聽法在我前坐汝所見
者是彼身光時彼迦葉還復歎曰此大沙門
乃有如是威德力能感梵王下來聽法實
爲希有我定得知亦證阿羅漢果至第五日
時烏嚕尾螺迦葉弟子摩拏嚩迦等五百人
衆俱事三火各有三鑪其鑪共有一千五百
是時世尊在彼樹下又值彼衆用火祭天彼
五百人常式發火火不能然彼弟子衆即速
告師至烏嚕尾螺所而白言曰師可知否我
等然火火終不然不知今日何因若此烏嚕
尾螺迦葉思惟是事而彼沙門在此近住恐
彼威力而有所制即與弟子同詣佛所而白

佛言汝大沙門我之弟子摩拏縛迦五百人衆常式用火而爲火祀今旦然火終不能著我疑此事定是沙門威力所制佛即答言汝欲火然迦葉答言欲然佛言汝去火當自然迦葉還家火已然矣時彼迦葉及與弟子皆稱讚曰此大沙門有力如是必應亦得阿羅漢果用火祭訖欲滅其火火不能滅盡其彼力終不能滅摩拏縛迦諸弟子等疾詣烏嚕尾螺迦葉之所自言我師知否火雖得然今不能滅迦葉報言此必還是沙門所爲迦葉復來至世尊所自言沙門火雖得然今不能滅莫是沙門而復制也佛即報言汝欲滅耶迦葉告言欲令火滅佛言汝但還去必自滅迦葉迴還火已滅矣又復歎曰此大沙門有是神力亦阿羅漢也至第六日烏嚕尾螺迦

命六

六

葉自欲用火祭其火天火又不然即自入定欲令火然火亦不然來至佛所而白佛言我自用火常式得然今不能然莫是沙門力所制也佛言迦葉汝欲火然答言欲然佛言但去火必自然迦葉迴還火已然矣用火事訖欲滅其火火又不滅又復入定欲令火滅火終不滅事不獲免來白佛言火雖得然今又不滅必是沙門力所制也佛言汝欲滅耶迦葉告言欲令火滅佛言但去火必自滅及至還家火已滅矣火滅已後以彼餘炭積於一處移時之後其炭自然與諸弟子同滅其火盡其力分終不能滅又來白佛汝大沙門火適得滅今還自然熾盛倍常我不能滅此必沙門力所制也佛言火又然耶答言火然汝不能滅耶答言我不能滅佛即報言汝但迴

去火自息滅迦葉即迴火已自滅迦葉歎曰
奇哉沙門有斯力也我欲然火火不能然告
以得然我欲滅火火不能滅告以得滅今火
再著不能再滅今火得滅亦由彼力是大沙
門有大威德此實希有必應亦是阿羅漢也
過是日已烏嚕尾螺迦葉作外道法設七日
命六
會彼摩伽陀國王仕庶皆悉聞知迦葉思惟
今大沙門在此近住前所火祀皆能力制今
所作法莫復制耶若彼沙門七日不來我法
必成若復來者或恐被制又作是念彼大沙
門相好端嚴威德殊勝國中仕庶若見殊勝
或恐捨我而事於彼以斯事故思念再三佛
即尋知佛於七日他處遊化雖在近住迦葉
及衆於七日中不見世尊時彼迦葉作七日
法國中仕庶悉持香華及與財寶廣作供養

作法既畢設會亦終却復思念彼大沙門七
日不見我今設會多有餘長沙門若來甚有
供養作是念已佛知其意即便行詣迦葉住
處迦葉纔見心即歡喜此大沙門我思便至
乃白佛言沙門來耶佛言我來又曰七日之
中何以不來佛言汝作是念我設七日法會
若彼沙門來者恐法不成我知汝意是以不
來今汝思念作法已畢沙門若來甚有供養
我亦知爾是以此來迦葉思惟此大沙門是
大聖者悉知我意必定亦是阿羅漢也佛與
迦葉言論已竟尋還所止迦葉於後以虔潔
心造諸飲食極令香美異其常品待至來日
自詣佛所自言沙門我以專心備辦食竟願
過我舍而受供養佛受請已而告之曰汝但
先去吾當便至迦葉既去世尊入三摩地猶

如壯士屈伸臂頃於瞻部洲界取瞻部樹果盛滿鉢已迴還先至迦葉住處跏趺而坐迦葉後至見佛先到驚而言曰沙門來耶佛言我來久矣迦葉又言從何道來佛即報言我從住處往瞻部洲界取瞻部樹果還來於此

命六

迦葉言大沙門乃有如是神通迅疾於少時間能往於彼取果還來此大沙門亦是阿羅漢也佛即以果示之迦葉汝曾見不迦葉言我未曾見佛言汝樂食不答言樂食佛言隨意迦葉食果歎未曾有食果已竟即以所造種種飲食自手奉上佛喫食已澡漱亦畢即為迦葉說偈祝願訖尋迴樹下又第二日請佛受供佛即依前入三摩地往弗婆提取菴摩羅果先至迦葉住處又第三日請佛受供佛入三摩地往西衢陀洲取得尾螺迦閉他

果還來先至迦葉住處至第四日請佛受供佛即入三摩地如屈伸臂頃往北俱盧洲取自然米飯鉢中持來先至迦葉住處安坐已久迦葉方來迦葉又問自何道來佛答迦葉我適往彼北俱盧洲取自然米飯持來至此迦葉歎曰此大沙門有是神通必是亦得阿羅漢果佛還問言北洲之飯汝樂食耶答言樂食佛言隨意迦葉食已歎未曾有於是以自所辦種種飲食奉上於佛佛受食竟澡漱亦畢即為迦葉說偈祝願已還歸樹下世尊來日乃自持鉢往四天王天直至忉利天取天酥味還來所止樹下而食喫食既畢思水澡漱帝釋天主知佛思水如展臂頃來至佛所白世尊言欲水用耶佛言欲水帝釋即觀近地先有涸池以手指之水即湧出清淨香

命六

九

潔無與等者佛即澡漱隨意受用帝釋天主
還歸天宮迦葉忽見驚怪非常而此涸池無
水已久今復水滿不知何來速至佛所而白
佛言大沙門此池久涸水因何有佛即報言
今日食畢無水澡漱帝釋遙知乃下天來爲
我出水迦葉歎言未曾有也食從天取水令
天出能感如是此必亦得阿羅漢也迦葉乃
立池名謂之播拈佉多佛於後時入池澡浴
池岸之側先有大樹名阿祖囉曩佛以袈裟
挂於樹上迦葉來至見佛袈裟挂於樹上知
佛澡浴即來瞻覩佛既浴訖出水上岸即展
其手欲攀樹枝時阿祖囉曩枝便低亞迦葉
乃見還復歎曰此大沙門實不思議感得無
情自然低亞沙門亦得阿羅漢也世尊後時
思欲洗衣云何得石而爲用耶帝釋遙知尋

至佛所自言世尊佛欲洗衣而用石耶佛言
要石帝釋即令夜叉於大山中取石一塊修
令平正復使光潔置於池側佛即洗衣洗已
欲嚙帝釋又令夜叉別取一石置於池岸佛
洗衣竟就石嚙之迦葉來至又見池岸忽然
有石乃自驚怪池岸先無今從何來而白佛
言大沙門池岸之石自何而有佛即報言我
欲洗衣爲無石故即起思念帝釋下來爲我
安置我又思念無處嚙衣彼天帝釋又安一
石二石所來皆帝釋也迦葉大歎此大沙門
凡^{命六}是所作非世之有必已證得阿羅漢也然
其所證應莫超吾迦葉之心似有省悟世尊
又以方便更現異相教化迦葉令入正道佛
即化彼尼連河水忽然汎溢居河左右人多
漂溺枯涸陂池處處皆滿佛所止處正居其

內佛以神力令水環遶四面壁立中心塵起迦葉是時見河汎溢最盛於常即思念言彼大沙門得不漂溺由是乘船速至佛所乃見世尊樹下經行步步塵起又以環水壁立不能下船歎異倍常遙相慰曰沙門安否得無憂惱耶佛言我無憂惱勞相諭也復思念言此大沙門自有神通何不離此迦葉又言莫欲乘船離於此耶佛言欲離於此迦葉白言若欲離者當自上船佛以神力如彈指頃已在船中趺趺而坐迦葉見佛已坐不見所來所入迦葉歎言沙門是大丈夫有大威德乃有神通能如是也迦葉白言我自亦得阿羅漢果然不及沙門所證之道佛知迦葉決定迴心便即告言汝自言證阿羅漢者非實證也迦葉忽聞世尊發如是語身毛皆豎轉自

命六

十一

尅責此大沙門悉能知我種種之事今宜師之以進其道作念已定而白佛言大沙門願知我意今欲於大沙門法中出家而爲僧伽稟奉教勅修持梵行唯願慈悲特賜聽許佛知迦葉證道時至又以方便化彼徒衆乃謂迦葉曰汝欲於吾法中出家學道爲沙門者還曾令諸弟子悉知以否迦葉答言弟子未知佛言汝爲人師不得卒暴且可歸還與弟子議若謂然者即可再來斯亦未晚迦葉奉教還至住處乃與摩拏罽迦等五百弟子同集一處告而言曰彼大沙門相好異常神通難及凡所動止天悉遙知或來座前而聽其法或有要用皆能給送累見神變我實不如今欲師彼出家以進其道吾已決定汝等如何細自籌量以實報我摩拏罽迦白迦葉言

彼火龍暴惡首先降伏神異他心衆人目覩我等所業悉自師傳師既未如弟子何說師若決志我等皆隨師若達彼宗源亦願垂於濟度我等已決衆共一心今或可行不可失也於是迦葉知衆誠願乃令弟子取事火具護摩杓等種種之器及鹿皮衣樹皮衣淨瓶拄杖革屨等物悉棄尼連河中以示不迴之相師徒相率同詣佛所頂禮佛足退立一面爾時世尊謂迦葉曰汝復來耶迦葉答言今與弟子同來欲於大沙門法中出家修學佛已懸知乃更審曰汝諸弟子誠心以否迦葉答言我與弟子皆悉誠心唯願慈哀咸垂濟度佛即默許度爲沙門又復報言汝等今朝是真出家是真梵行披袈裟衣而實沙門爾時烏嚕尾螺迦葉身著袈裟成沙門相又聞

命六

十二

佛言汝今是真出家是真梵行私自慶喜我心全滅又復思惟往昔大仙嘗說斯事世稀有佛出興於世得無上覺具一切智是大聖人天上人間悉能利樂我於前時夜出觀星有大火聚謂其事火與我同宗乃是梵王帝釋四天王等互來聽法今惟此事是大聖人此非大聖孰爲聖也於是迦葉易沙門稱呼佛爲世尊

衆許摩訶帝經卷第九

衆許摩訶帝經卷第十

宋西天譯經三藏朝散大夫試鴻臚少卿明教大師法賢奉詔譯

爾時烏嚕尾螺迦葉有其二弟一名曩提迦葉二名誡耶迦葉是二迦葉各有二百五十學徒悉在尼連河下流岸側而住各於師法勤加修習是二迦葉一日於尼連河中忽見烏嚕尾螺迦葉祀火之具護摩杓等及鹿皮樹皮衣乃至淨瓶拄杖革屣等物悉從尼連河中流下乃驚怪思念我兄迦葉得無王難耶得無賊難耶乃至水火等難因是難故退失修行若不爾者云何祀火之具種種之物棄於水中任自流下審知今日必見差異於是二弟思議再三共行尋兄原其的實至兄住處不見迦葉及弟子輩唯餘所居空寂而已時二迦葉倍極悽然即詣鄰人訪其所以

鄰人報言烏嚕尾螺捨棄仙道將諸弟子歸於沙門我等諸人不知其事請自詣彼詢其因由時二迦葉聞此說已互相謂曰我亦聞有沙門近來此處凡諸舉止皆異常人儻或我兄及與弟子若實然者極爲稀事今可往彼自觀虛實二人相將同到佛所方見其兄烏嚕尾螺及與弟子被袈裟衣成沙門相悉坐佛前瞻仰聽法時二迦葉目覩斯事因知其實心驚毛豎足不能進佛見曩提誡耶來尋其兄又見立於會前足不能進即遣烏嚕尾螺自起迎接時二迦葉既覩其兄離席迎接即趨進前來禮足問訊二迦葉言我兄者年有德久已修行博學該通世無等者摩伽陀國王及大臣乃至士庶皆謂我兄證阿羅漢道常持種種香華欲食上妙衣服及以珍

寶而來供養凡有言說莫不諦信如何今日
忽棄已道便隨他教我本修行依兄指授乃
至弟子咸無異轍兄今自棄本所修習我等
云何更堅進趣處大疑網願賜開解作是說
已願住一面時烏嚕尾螺迦葉告曩提誡耶
等言往世無佛猶若冥夜人無慧目不知沉
墜我於是際苦節修行事火爲功每祈聖證
復以此道轉教汝曹餘人無能得過我道便
即自謂證阿羅漢有大沙門曰佛世尊身長
丈六金色晃耀相好具足威德特尊哀愍我
故來近止住命六凡所動靜天悉遙知四天大王
乃至梵釋咸來聽法又見神足於剎那頃往
復四洲乃至天上取酥陀味悉皆示我又復
知我實未證得阿羅漢道以斯事故我道不
如省悟宜先誠慙後悔乃與弟子投誠出家

哀愍我故便垂救濟令著法服度爲僧伽先
不告汝吾之過矣時曩提迦葉誡耶迦葉根
緣已熟便生信向聞是語已悲喜交至乃謂
兄言我本修行因兄教授兄今棄捨我亦願
隨又復言曰無佛出世寧聞正法雖止老耄
亦希出離烏嚕尾螺告言善哉善哉今正是
時曩提迦葉誡耶迦葉即前詣佛頭面著地
禮雙足已退住一面向白言世尊我兄烏嚕尾
螺先是本師今者出家已爲沙門我今亦欲
出家願賜濟度佛雖然許還令導彼徒衆而
告之曰汝等弟子悉知以否二迦葉言未知
佛言汝可令知還來度汝時二迦葉承佛教
勅還歸所住各集弟子告而言曰摩拏縛迦
汝還知否有大沙門其名曰佛來近我師迦
葉止住累以神通顯現異相皆令我師一一

目覩又以法力制其所作我師省悟知法不如將諸學衆投彼出家我因見其所棄受用隨水流下乃自訪尋委其緣由及到於彼已見我師迦葉及五百弟子悉著袈裟成沙門相在會而坐聽其說法我見是事初大驚怪不能前進我師迦葉離席來迎具說前事我聞殊勝亦願出家載念汝曹迴來相報吾意如此汝等思之以信實心各報於我彼二迦葉說是語已時摩拏嚩迦弟子之衆白迦葉曰我等修學從師所受師辯勝劣弟子寧知師尚投彼出家我等云何執守如或決定亦願相隨於是曩提迦葉誡耶迦葉各領弟子同詣佛所至佛會已頂禮佛足退住一面爾時世尊告迦葉言汝等來耶時二迦葉答言已來又白佛言我等各將諸弟子同來投

佛於正法中願得出家稟奉尸羅修持梵行願佛大慈哀愍聽許佛即攝受度爲沙門佛又報言汝等今朝是真出家是真梵行時迦葉等聞是語已歡喜踊躍不能自勝各各禮佛旋繞畢已瞻仰而住爾時世尊度迦葉等千苾芻已即離適悅之地將耆年迦葉等一千苾芻往詣耶山頂塔處經行到詣耶已佛爲諸苾芻等現三種事一者神通二者說法三者調伏於是世尊入三摩地現神變相於本座沒而於東方虛空之中現行住坐卧四威儀事又於身上出五色光所謂青黃赤白及與紅色又復身上出水身下出火身上出火身下水乃至南西北方皆現是相現神變已於剎那間還復本座爾時世尊又與說法謂諸苾芻汝於心意識等諸法之中有疑

無疑有念無念可滅不滅於斯諸法汝決定
行又復告曰汝等當知眼識爲緣貪於諸色
因色觸故內心發生即有苦樂或非苦非樂
乃至耳鼻舌身意亦復如是諸苾芻貪火既
爾嗔癡亦然由是輪迴生老病死憂悲苦惱
諸苾芻三火熾盛由我爲本欲滅三火當斷
我本我本若斷三火自息於是三界輪迴一
切諸苦自然斷絕時三迦葉及千苾芻又蒙
世尊現神變相及說正法得諸漏盡得心解
脫所作已辦捨諸重擔正得已利永斷輪迴
悉皆證得阿羅漢道爾時世尊於誡耶山頂
度三迦葉及弟子千人皆證阿羅漢道已時
民彌婆羅王及輔相大臣乃至士庶悉知世
尊在誡耶山頂有弟子衆數滿千人有一大
臣告於王曰我聞國人近有言論彼釋族中

生一童子初生之時有雪山邊婆伽羅體河
岸往昔迦毗羅仙住處有一善相婆羅門相
而言曰今此童子相好具足福慧圓滿必爲
金輪聖王王四天下盡大海際悉在統御正
法理世民行十善復有輪寶摩尼寶女寶主
兵寶主藏寶象寶馬寶如是諸寶自然出現
恒常隨逐又有千子色相第一具大勇猛能
破怨敵四洲畏威悉皆降伏然或出家剃除
鬚髮著袈裟衣正心修行必成無上正等正
覺具以上事悉白於王請早圖謀勿令後悔
如能殺者保國終吉時民彌婆羅王在正殿
上獨坐思惟常念五種之事一者常願如來
應供正徧知明行足善逝世間解無上士調
御丈夫天人師佛世尊出於世間二者早得
往彼瞻禮隨喜三者到已便得聞法四者如

所說法悉能了知五者爲我受戒受已稟持
方念斯事忽聞大臣計議之言傷嘆良久報
而言曰汝實愚人欲於如來起極惡心是大
愚癡汝可速去勿更發言時彼大臣聞是語
已知不聽從慙懼而退爾時民彌婆囉王即
顧左右親位大臣福相圓滿有智慧者而告
之曰汝去往彼誡耶山頂世尊之所代我恭
敬而請世尊如我辭曰民彌婆囉王稽首雙
足恭肅無量問訊世尊少病少惱起居輕利
安樂行否今請世尊降臨宮城微受供養當
使於我及彼人民獲大利樂唯願世尊及與
聖衆耆舊大德皆悉降臨當盡此生奉以飲
食湯藥乃至卧具及僧伽梨等一切供給不
使乏少願大慈悲無辭勞屈如是說已頂禮
佛足顙聽聖旨佛即默然時彼使人知佛受

請作禮旋繞辭已而退爾時民彌婆囉王聞
使迴旋速御前殿受使朝拜君臣禮畢遽發
問言世尊來耶使人近前而奏王曰臣奉王
旨詣誡耶山請佛及衆具以王旨白於世尊
佛已默然必來降赴時王降勅左右大臣便
可嚴潔宮殿及與城隍乃至四衢命六悉令清淨
復設種種名香妙華以備迎接爾時世尊與
耆舊迦葉及千阿羅漢離誡耶山詣於王城
去城不遠有杖林塔佛與大衆至塔而住時
民彌婆囉王得聞世尊與諸聖衆至杖林塔
安住已定即令所司嚴整車駕前後導從與
自眷屬及諸群臣欲出於城詣杖林塔所出
宮未遠王所乘車地忽有坑輪陷不進王自
思念我必往昔曾造不善致於今日有斯事
也纔起是念即聞空中有聲告曰汝於往昔

無不善業但爲見在諸牢獄中多有禁繫車輪之陷正爲此也王聞空言定知賢聖旣蒙指諭心極感重即遣使人散詣諸獄以罪輕重等第赦之車駕前進至於城門王之寶冠又忽破壞復思念言我定往昔曾作不善乃於今日疊有不祥王發是意空中賢聖又復告言天子汝於往昔無不善業但緣前來所放禁繫之人輕者已放重者雖活猶繫別處冠破之祥乃爲此也王聞賢聖空中語已便令使人諸處詔喚咸到車前悉赦宥之罪人獲免歡喜踊躍稱王之德時王部從及諸眷屬所乘之車有一萬二千復有國中婆羅門長者及諸人民亦有百千車同出城門詣世尊所時王至杖林塔於近苑內取迦俱那華五朶自手執持詣於佛所去佛不遠下車徒

步免去傘蓋劒仗之類使令相隨旣至佛所偏袒右肩合掌向佛三自稱言我是民彌娑羅王佛亦三印如是如是王即以五朶華奉上於佛然後頭面著地禮其雙足又以種種言辭而伸讚歎佛即報言請王就坐王昇座已其王眷屬及婆羅門長者士庶等次第禮佛歡喜踊躍各各以偈讚於世尊讚詠畢已却住一面時烏嚕尾螺迦葉先是王及大臣一國士庶所尊重者今爲沙門侍立佛側王及人民莫不疑怪咸起念曰耆年迦葉事火修行勤苦彌久智慧道德皆出人右今在衆會生我等疑爲是如來奉迦葉教耶爲是迦葉奉如來教耶作此念時佛即玄鑒乃謂迦葉曰汝自知時迦葉承佛聖旨不起於座入三摩地於本座沒現於東方作行住坐卧四

威儀相又復身放光明而有五色所謂青黃赤白紅其色間雜猶如玻瓈又復身上出水身下出火身上出火身下出水南方西方乃至北方皆亦如是現神變已忽然之間還來衆會合掌向佛說伽陀曰

我本修行奉事於火彌歷年歲疑設勤勞心常自謂已證羅漢執著我相不能解脫佛大慈悲而來濟度制火不然又令不滅初謂同我亦事於火言無所求事火何用天上人間無所愛戀我設法會爲求利養欲來不來命六皆知我意又於四洲二十及彼天界取果及飯悉於我食我執事火迷於正行猶若盲者復如死人無有見知定趣墜墮摩訶牟尼猶如大龍布精進雲灑甘露雨利益一切有情無情我欲出離求作沙門

蒙佛大悲說清淨法於最上句使令知覺我今實證阿羅漢果佛爲我師我是弟子諸人當知勿生疑念此誠實言宜應諦信爾時迦葉說伽陀已頂禮佛足還復本座時會大衆王及人民實知迦葉是佛弟子佛知衆會疑心已息乃謂王曰我今爲汝演說法要汝當諦聽善思念之王及衆會受教而聽佛言大王汝今當知如王身色有生有滅當審觀察生滅二相今實了知復觀受想行識亦同於色善男子若能於此如實了知是生滅已當復觀察是非生滅若能了知色非生滅即知受想行識亦非生滅善男子色受想行識本非生滅無去無來若能如實了知本非生滅無去無來亦復不住非生非滅無去無來大王若於此法如實知已即得無數阿

僧祇寂滅之法時彼會衆一切婆羅門長者
士庶中有生疑念者世尊今說色受想行識
本無者云何有我相人相衆生相壽者相布
捺誡羅相摩拏縛迦相主宰承事等相若此
我人衆生壽者等相亦實無者云何知彼衆
生所作善不善業二種因果捨此蘊已復趣
他蘊爾時世尊知彼衆中起心念已即謂迦
葉等曰諸苾芻所有我人衆生壽者等見乃
是凡夫愚人若有是見當感其苦若知苦生
當求苦滅諸苾芻種種有爲因果之法乃從
種寂而轉生故我自知已欲令衆生於生滅
法亦同我知諸苾芻佛眼清淨過於天等所
有衆生好相惡相及生貴賤善願惡願隨衆
生業我今一一如實了知衆生身業具如是
事口業具如是事意業具如是事略說衆生

邪見起於邪業或於佛法而生毀謗由斯業
故命終之後墮於惡趣備受衆苦諸苾芻若
有衆生於其身口作諸善業具正見正行正
業而於佛法常欣讚譽由斯善故命終之後
生善逝天諸苾芻我有如是知見非不能知
我相人相衆生相壽者相布捺誡羅相摩拏
縛迦相乃至主宰承事等相或諸所作善惡
因果捨此蘊已復趣他蘊如是等事亦無所
有我先已說種種有爲因果之法從因發生
從因得滅所謂因於無明緣生於行行緣生
識識緣生名色名色緣生六入六入緣生觸
觸緣生受受緣生愛愛緣生取取緣生有有
緣生生生緣生老死憂悲苦惱以是因緣得
一大苦蘊生諸苾芻若滅其因一切皆滅所
謂無明滅則行滅行滅則識滅識滅則名色

命六

三十二

滅名色滅則六入滅六入滅則觸滅觸滅則受滅受滅則愛滅愛滅則取滅取滅則有滅有滅則生滅生滅則老死憂悲苦惱滅如是則一大苦蘊滅諸苾芻集因滅故苦自然滅若苦止息得涅槃樂又復我相永斷正滅非轉了苦非有滅云何滅是得止息是得清涼離一切句是則涅槃

衆許摩訶帝經卷第十

音釋

翌 逸織切 翌 照所賣切
杓 是若切 把 儻 坦
之 切 或 然 之 辭

衆許摩訶帝經卷第十一

第十二

命七

宋西天譯經三藏朝散大夫武鴻臚少卿明教大師法賢奉 詔譯

爾時世尊復謂民彌婆囉王曰汝觀色是常非常耶王曰非常佛言是苦非苦耶對曰是苦世尊又言受想行識是常非常耶對曰非常又曰是苦非苦耶對曰是苦佛言色受想行識悉是非常是苦是顛倒法一切無我佛又告言大王當以正智正慧觀其真實彼色受想行識有過去現在未來耶有內外麤細貴賤遠近耶對曰色受想行識非過去現在未來亦非內外麤細貴賤遠近等佛言善哉大王若能於此五蘊如實了知是非常苦空無我之法復以正智觀其真實知非過去現在及以未來乃至內外麤細貴賤遠近等又能不著不捨者斯真解脫大王得斯解脫者

是智解脫梵行已立所作已辦我生已盡永不復趣輪迴之道爾時世尊說是法時民彌婆囉王及八萬天人遠離塵垢得法眼淨及有婆羅門長者士庶等百千人衆亦離塵垢得法眼淨於是民彌婆囉王得法知見已於法堅固斷其貪愛除去疑惑正信不退即從座起偏袒右肩合掌向佛白言世尊我心柔順歸依佛法及以僧伽持近事戒永不殺生今請世尊常住我國願盡形壽奉上衣服飲食卧具湯藥常無乏少乃至聖衆盡生供養佛即默然時王見佛默然受請歡喜踊躍不能自勝即以頭面禮佛雙足旋繞畢已辭別而退爾時諸苾芻衆見民彌婆囉王蒙佛世尊爲說妙法不起於座遠塵離垢得法眼淨心皆生疑此王云何遇佛世尊便得聞法證

法眼淨除去塵垢作是念已佛即玄知告而
言曰諸苾芻此民彌婆囉王乃於過去作大
善業所作決定果報無差今爲人王具大福
德乃宿世因感果如是諸苾芻地水火風外
界熱時蘊界六根一切好醜隨其所作善惡
之業悉皆獲得果報不虛爾時世尊即說偈
言

衆生之所作 善惡經百劫 因業不可壞
果報終自得

諸苾芻過去世時有佛出世名阿囉曩毗十
號具足爲人天師時佛世尊爲諸衆生說種
種法化利畢已即入涅槃彼諸弟子收其舍
利擇清淨地建立妙塔復以種種香華而恒
供養過是已後久歷年歲有轉輪王出於世
間名羯里計時有兵衆十八俱胝常領是衆

飛空巡幸復有七寶常爲先導後於一日經
過塔上有虛空神捉其輪寶住空不進時羯
里計王思惟是事今我方行輪寶自住恐是
福盡感應斯現彼虛空神乃告之曰大王汝
非福盡下有阿囉曩毗佛舍利塔端指輪寶
不得直進時羯里計王與十八俱胝飛空兵
衆同時降下詣於塔所王及眷屬各以妙衣
共拭佛塔得清淨已散諸妙華及焚寶香又
作種種音樂而爲供養以頭面禮發其誓願
以我今日師事於佛所設供養種種功德果
報不虛當來獲得諸苾芻於意云何彼羯里
計轉輪聖王并諸眷屬者即民彌婆囉王及
眷屬等是諸苾芻以彼供養阿囉曩毗正覺
之塔種種功德當感無數百千俱胝劫受天
上人間最上快樂以本願力今值於我復作

供養所獲功德乃與阿囉曩毗正等正覺平等無異諸苾芻一切衆生作黑業者黑業相續作白業者白業不斷或作雜業亦復如是諸苾芻所獲果報悉從因業汝等當知廣爲人說爾時會中諸苾芻衆以民彌婆囉王見佛聞法遠塵離垢又聞說彼往昔之事乃於烏嚕尾螺而起疑心云何世尊爲現神通種種教化方得迴心彼曩提議耶隨言受化佛大慈悲具一切智必能斷除我等疑惑作是念已將欲發問佛即告言修因感果定不虛爾諸苾芻過去劫中人壽二萬歲時有佛出世名曰迦葉如來應供正徧知明行足善逝世間解無上士調御丈夫天人師佛世尊彼佛亦在波羅柰國鹿野苑中作大佛事化利畢已即入涅槃時世有王名羯里計常於彼

佛恭敬供養佛旣入滅王以種種香木茶毗世尊復以乳汁灑滅餘火即收舍利貯四寶瓶又選勝地起大寶塔其塔高聳量一由旬王及人民常作供養時彼國中有一長者家中巨富等毗沙門天眷屬衆多自在快樂先與別族長者而爲朋友常於佛塔廣興供養後娶其門以爲姻戚歲月綿久乃生三子於後長者年耄有疾服藥不差漸漸羸困乃趣無常三子以禮葬於尸林是時三子思憶訓誨旦暮啼泣又念家富共議追福長兄慳悛命七先未知善忽聞欲施初即遲疑以孝存心尋便允可長兄言曰布施之外分充受用二弟應諾即持金銀種種財物詣於塔所作最上供養如是施已同發誓言願以善根所生果報於當來世以今正等正覺迦葉之稱爲其

姓氏佛出世間亦得值遇聞法信解證於菩提發誓願已禮拜旋繞歡喜而歸是故迦葉今得此姓值遇於我而爲沙門復聞正法證無學果諸苾芻烏嚧尾螺初難化者以彼宿世欲檀施時心有遲疑是故我現種種神變方得省悟曩提誡耶而易化者亦由往昔檀施之時心本清淨始終無異諸苾芻是故烏嚧尾螺及曩提誡耶復爲兄弟得迦葉姓又值於我聞法證道此往昔事汝等諦信爾時世尊說是迦葉往昔事已離杖林塔於王舍城不遠就一樹下與千苾芻衆圍繞而住時民彌婆囉王以佛近住欲立精舍安佛及僧而久住止民彌婆囉王爲太子時常出城外而爲遊戲去城至近有一園苑林樹蔭鬱泉池清淨雖復四序華竹恒茂太子愛樂而欲

命七

五之一

求買園主長者自恃耆耄無亦家富太子逼取終不允從出言悖慢聞於太子我寧離此國不捨此園太子聞已謂左右曰今此耆耄言甚不遜我若紹位無得忘也於後父王摩賀鉢納摩崩已即灌頂傳寶號民彌婆囉王既紹其位乃憶前事下令所司發使奪取時彼長者速得心病便趣無常命終之後以其憤怨積聚毒惡乃於園内生蛇趣中含毒伺隙欲酬前恨後於一日王因春節將諸嬪嫔遊幸彼園盡極歡娛以肆其意王方疲困寢息園中時彼毒蛇謂其得便疾出窟穴欲來蠶王時諸嬪嫔散行遊冶王有親近內侍一人執劔侍衛防其不虞時有飛禽名迦蘭那迦飲啄翔翔常在園內忽見蛇出相呼鳴噪執劔內侍見蛇出已即斷其命禽衆極噪王

命七

五之二

亦驚寤問執劍者緣何喧擾執劍者曰適有
毒蛇欲來螫王迦蘭那迦相呼驚噪我既目
見已斷蛇命王聞是語心驚毛豎令詔太子
及諸大臣共議斯事古剎帝利灌頂大王或
於身命欲致危害有能忠力濟其難者當何
賞賜大臣對曰能於身命脫其難者可分半
國以賞其功王乃允從分其半國與迦蘭那
迦用賞其功大臣對曰彼迦蘭那迦飛禽之
類與國境土當何所用王謂大臣此事如何
大臣對曰可就窠巢多植竹木使其遂性勿
令傷害如斯可矣餘不能爲王聞曰善遂從
其奏乃於園外別擇一處廣種竹樹安迦蘭
那迦令人守之不得傷害王有親舅本事仙
道常求淨處進其修習王以迦蘭那迦竹林
無諸雜穢權令安處及見世尊將諸苾芻近

城樹下露地宴息思欲捨彼造立精舍王乃
嚴駕自詣佛所禮雙足已却住一面爾時世
尊爲王說法以種種方便化令歡喜復勸精
進當求最上寂靜快樂時王聞法歡喜頂受
即起於座偏袒右肩合掌頂禮白言世尊我
今請佛及諸聖衆於我宮內來晨受食唯願
慈悲哀愍聽許佛即默然爾時大王見佛默
然知己受請歡喜踊躍禮拜而歸乃下所司
即於是夜疾速備辦種種飲食及與香華皆
令倍常美妙清淨復勅宮城內外乃至四衢
道巷之中悉使嚴潔纔至明旦即遣使人白
於世尊飯食已辦請佛降臨於是世尊與千
阿羅漢著衣持鉢前後圍繞行詣王宮王於
門首執爐焚香待世尊至佛既到已迎入就
座諸聖衆等亦各就坐王與眷屬瞻禮畢已

奉上飲食焚香散華歡喜供養佛與聖衆食畢澡手王及眷屬樂欲聽法佛爲說法各各諦聽歡喜信受王復離座合掌白佛我今欲以迦蘭那迦竹林作佛精舍願佛納受世尊默然王知佛許即取金瓶灌於佛手奉施畢已願佛隨意即爲世尊廣作嚴飾佛與聖衆隨意而住迦蘭那迦竹林精舍因茲所立爾時世尊後於一時爲利樂故與諸聖衆離迦蘭那迦竹林精舍往寒林中經行宴坐時王舍城有一長者請佛及衆來晨供養乃於是夜與諸眷屬及僮僕侍人共辦飲食香華等事時給孤長者因有事故到王舍城經過彼家遇夜止宿見其長者家中老幼皆不寢寐辦造飲食珍饌之類怪而問曰長者之家老幼不寐辦造飲食當何所用爲請王耶爲請

大臣莫爲姻親而有聚會長者報言我不請王及大臣等亦無姻親聚會之事今爲有佛出於世間將一千聖衆遊化此國王及眷屬大臣士庶悉皆歸向次第供養我爲彼佛及與聖衆來晨設齋是不寢寐給孤長者聞此語已歎異非常又復問言云何名佛對曰彼釋族中有王淨飯生一童子號悉達多具輪王相棄捨出家苦行修習證得阿耨多羅三藐三菩提斯即佛也又復問言云何聖衆對曰有利利族或婆羅門族乃至毗舍輸陀如是之族善男子輩投佛出家剃除髮鬚被袈裟衣正信修行聞法悟解悉皆證得阿羅漢道此是隨佛一千聖衆我所供養正爲此也給孤長者聞是說已身毛皆豎歡喜踊躍又復問言如我云何得見彼佛及與聖衆對曰

明旦咸來我舍受食給孤長者雖聞是語有
若心狂不待天曉欲往佛所時方半夜值月
明朗即便出門行詣寒林未至中途月忽雲
蔽又至一門不敢前進給孤長者以天陰黑
便生怕怖佇立思量得無非人之類而來惱
我耶心欲退還足不前進時有天人發聲告
曰長者但去勿得退心唯有吉祥定無惱亂
於意云何譬如百車百馬種種莊嚴可令衆
生見者愛樂以斯布施不如向佛前進一步
十六分之一分功德又復告言長者但去勿
得退心唯有吉祥無惱亂事於意云何譬如
一百金象衆寶莊嚴以斯布施不如向佛前
進一步十六分之一分功德長者乃至百童
女以真珠瓔珞衆寶嚴身以斯布施亦復不
及向佛一步十六分之一分功德時彼天人

即發身光照耀途路自彼門所直至寒林如
月盛明等無有異給孤長者乃問天曰是何
聖賢能作斯事天人告曰我昔曾爲舍利子
母名捺誡囉也命終之後生四天王界今名
摩度娑健駄摩拏嚩迦見守此門願勿疑慮
長者可去必獲吉祥給孤長者聞是語已讚
言善哉稀有斯事我今定去見佛無疑給孤
長者又復思惟若無正覺出於世間無由得
聞最上妙法於是長者得其光明無所障礙
直至寒林世尊住處爾時世尊在寒林外經
行時長者見佛威德相好異於常人即便合
掌而發問言是世尊否佛答言是長者身心
歡喜無量又復問言世有何人而得安睡佛
說伽陀而答之曰
若人心寂靜 一切得安睡 若人繫染欲

熱惱心不止 染欲熱惱除 解脫無所繫
心意調伏已 得息得安睡

爾時世尊說伽陀已與給孤長者同入林中
佛還本座長者即前禮佛雙足於一面坐樂
欲聽法佛乃勸發令心歡喜爾時世尊告長
者言布施持戒得生天上雖五欲自在非爲
究竟欲免輪迴當斷煩惱於善惡法廣爲分
別是時長者得聞是法以宿善力深心思惟
蓋障即除心喜無量佛知是已即爲廣說苦
集滅道四聖諦法是時長者不起於座證四
諦理如潔白衣易染其色隨彼所染皆成上
妙長者得法知見永斷疑惑於佛法僧深信
堅固即從座起偏袒右肩合掌頂禮白言世
尊我今歸依佛法及苾芻衆持近事戒永不
殺生爾時世尊問長者言汝何名字長者對

曰我於國中少有資產或是貧賤孤獨之人
來丐求者我施飲食及彼資具國人名我爲
給孤獨汝國何名對曰舍衛願佛及衆來降
我國當以衣服飲食卧具湯藥一切受用畢
生奉施佛言長者我與苾芻數踰千人彼無
精舍何以安住長者對曰佛若降臨速當建
立唯願大慈不違我請佛即默然給孤長者
見佛默然知己受請歡喜踊躍頭面禮足旋
遶而退於是長者入王舍城營構事畢將欲
還家再詣寒林請佛及衆勿慮精舍願早垂
降言已還家自此日後一切皆停於舍衛城
周徧内外求覓殊勝清淨之地欲建精舍安
佛及僧唯有祇陀童子園苑最勝何以故此
童子園其地寬廣無諸穢惡行樹蒼鬱泉池
清淨寒風暑氣俱不能侵又無蚊蚋含毒之

蟲唯有吉祥飛走之類又復王城不遠不近
非求法人不能到此若建精舍斯爲最勝思
念已竟即詣園主祇陀童子而告之曰童子
勿怪我有勝事欲以上聞童子可容方敢陳
說童子告言有事可說長者起立謂童子言
欲買茲園當爲世尊及千聖衆造立精舍而
請安住尊若容允價即稟言祇陀童子告長
者曰一切可得唯園勿言長者又曰我聞佛
言一切無常無有主者以不堅法宜易堅牢
童子報言非我所知勿復更說長者又曰佛
者難值園即易求今或遲疑後施無及祇陀
童子雖聞此說心未能捨乃以要言詭彼長
者若能以金布滿其地我即與汝任自所爲
長者審知恐未誠信報而言曰童子若爾可
聞市官當使兩情執無反覆童子俛仰共聞

命七

十一

市官時四天王遙知斯事佛今出世舍衛城
中給孤長者買祇陀園造立精舍兩人商議
取正市官我今變身與成其事天王變身作
市官已來於市肆顙望給孤與童子至二人
至已給孤先言我買彼園欲造精舍今以黃
金布徧其地若能爾者即可相與今來取正
此價云何市官言曰二人之心得可否未對
言已定市官言曰善哉善哉童子收金長者
得園童子默然更無違悔長者即日速以車
乘象馬之類乃至僮僕搬運黃金處處布訖
唯前面少許而未周足長者籌慮取何藏金
可徧此地如是之際童子告言汝已迴意便
可收金長者報言我意不迴思何藏金可徧
此地以斯事故籌慮少時童子思惟奇哉長
者能捨如是大財爲佛及僧造立精舍又復

思惟我曾聞說若非正覺出於世間一切衆生不聞正法斯可助施理必相容即謂長者勿更取金欲迴此地我施作門美可共成功亦圓滿長者報言我非無金童子爾者誠爲甚善布金纔畢方欲命工外道悉知速來惑亂謂長者曰瞿曇沙門今在摩竭陀國王舍城居此舍衛城地貴名高非彼所住勿立精舍勿得迎請長者即怒報外道曰此舍衛城非汝所有何關汝事外道聞已知不從心復詣於王王亦不允諸外道輩面慙無色心極煩惱復詣長者而告言曰我先所說不爲園苑但以彼衆非我同修長者今日若是堅執斯有所報請不相違我聞瞿曇有大弟子先已到此可與論義即辯勝劣如彼得勝精舍可爲若其不勝何用迎請我此所說君見如

命七

十三

何長者告言此說甚善若定勝劣足得相依清濁要分真僞斯辯

衆許摩訶帝經卷第十一

衆許摩訶帝經卷第十二

宋西天譯經三藏朝散大夫試鴻臚少卿明教大師清寧寺 辯譯

爾時世尊在於寒林受給孤長者請預知舍衛國中有諸外道各各苦行又復聰明雖勤修習不得解脫根緣已熟受化是時世尊又觀誰可往彼唯舍利弗乃有宿因此若先行必有利於是世尊喚舍利弗令先往彼舍衛大城助給孤獨建立精舍尊者受命往舍衛城詣長者所事皆參議給孤長者承外道意來白尊者彼欲論義於理如何又云此國之人素未知佛於法勝劣宜其宣揚舍利弗曰善哉善哉斯言誠諦尊者於是入定觀察諸外道輩及舍衛國人根緣成熟有幾時分見彼人衆唯餘七日尊者出定告長者曰請語外道過七日已可來論義長者具告外道

命七

十三

思惟立七日限斯有二事一者知己非勝設計私逃二者或求本朋來共商權如是思已我今云何不求朋侶由是諸處親自訪尋乃得一人名赤眼婆羅門而告之曰彼瞿曇沙門有大弟子索我論義汝婆羅門應宜相助何以故若自得勝利養猶存彼或勝時我等何往彼即問言何時論義報曰後當七日至時相報必來助汝然婆羅門憂其墮負心甚煩惱發信諸處求告朋黨七日滿已給孤長者就寬靜處權立論場即爲舍利弗尊者排師子座爲彼外道對排高座列座既畢遠近咸集若公若私迨及少長有百千人集彼論處亦有別國外道婆羅門亦來會所給孤長者手執香爐焚以妙香與眷屬等同爲擁從迎舍利弗上師子座尊者坐定一切瞻仰觀

其威容悉皆讚歎時彼外道與眾相隨亦昇高座安坐已定尊者告言汝欲何作外道言我現神通我既現已汝當亦現尊者報言我所作者天上人間所不能作云何汝言能同我作尊者又言赤眼婆羅門汝所作者我悉能破赤眼婆羅門化作華樹如實芳葩豔冶動眾尊者神力出微少風其華根苗吹散異處又化一池水滿澄湛蓮花徧發人讚異常尊者化出大象膚體端正入池蹂踐須臾狼藉外道又化一龍而有七首張鱗努目奮惡擎空尊者化金翅王從空飛下坐於龍首龍自降伏時彼外道乃於最後化羅刹身立在眾前醜惡異常人見恐怖尊者持呪神力縛之羅刹苦惱翻生瞋怒外道驚怖身毛皆豎恐惡自傷發言求救告尊者言我今歸依願

命七

十四

賜救護尊者解呪羅刹怒息時赤眼婆羅門得脫羅刹怖畏之難又復覺知本所修習非是正行告舍利弗曰願於尊者正法出家而爲沙門尊者大慈哀愍聽許舍利弗即與攝受度爲沙門後修梵行斷盡煩惱雖居三界而離貪毒其心平等由如虛空觀金如土而無別異於後修習得三明六通證阿羅漢果乃得帝釋梵天而來供養時大衆驚怪目注心疑異口同聲讚舍利弗是論義師無人能敵猶如牛王處於衆群一切瞻仰無有馱足時舍利弗知衆心意及其種性即爲廣說苦集滅道四聖諦法是會大衆有發三歸心者有發聲聞菩提心者有發辟支菩提心者有發無上菩提心者亦有出家證得須陀洹果有證斯陀含果有證阿那含果有證阿羅漢

果論義畢已會衆皆散諸外道中有執性者
以其論義不勝辱於屈伏潛共計議欲謀不
軌可投長者請作工人或得便時殺彼尊者
設計已定白長者言汝已斷我一切利養今
者無所歸趣却願相愍收作工人或察卑心
且住鄉土或不從允各去他邦哀告再三傍
不忍聽長者於是具述彼意白舍利弗仁可
思察於理如何舍利弗即入三昧觀彼根緣
證道非遙遽云無患長者即退錄其姓名遣
作工夫例與其直時舍利弗化出一人於工
夫中便爲首領尊者於後觀知根熟來彼役
所就一樹下安詳而坐時彼外道初爲得便
各各心喜欲來親近而彼首領執杖驅策不
得前進役既疲苦乃發聲言聖大尊者救我
救我舍利弗曰汝等疲勞可自歇息諸外道

言此大尊者我發殺心欲謀其命今亦知我
而令止息實自慙懼無以再言時舍利弗察
其追悔又知根性成熟時分乃呼近前便與
說法即爲演說苦集滅道四聖諦法外道聞
已所有身見如二十山峯以金剛智悉破無
餘應時獲得須陀洹果復言尊者欲於正法
出家爲僧舍利弗攝受度爲沙門漸漸進修
精持梵行見於輪迴趣其究竟斷盡煩惱證
阿羅漢果其心平等猶如虛空觀彼金土兩
物不異棄捨世利得大清涼當受帝釋諸天
一切供養爾時舍利弗化外道已即與給孤
長者共持一繩各執其頭量度精舍都大界
至界至已定給孤長者所感果報於兜率天
現金宮殿給孤長者不達聖意謂舍利弗曰
今此精舍不獨只爲諸阿羅漢我爲如來應

正等覺舍利弗曰我本所作正爲如來及阿羅漢又謂長者曰汝此封地天報已現即借天眼令其自見長者見已驚喜無量於是復發上上品心舍利弗又自持繩一頭令長者還執一頭於中分擘十六殿堂六十小堂佛僧住處各各已定彼金宮殿變寶莊嚴尊者借通復令觀見長者歡喜乃自歎曰我此所作當感如是福德之利長者自見當來福報重重有異復更於事轉倍精勤擘殿堂已及備其中一切受用精舍事畢復白尊者世尊行住其量云何尊者報言用輪王儀於是長者自舍衛國至王舍城每十俱嚕舍各造一宮以備如來止宿之地及置庫藏收貯一切所受用物復令主者而恒守護以白檀水日日灑淨伺候如來令其香潔處處如是皆使

嚴備辦事畢已即發一人詣王舍城請佛及衆謂所去人汝到於彼代我詞曰給孤長者稽首雙足白于世尊少病少惱起居輕利安樂行否所立精舍今已嚴備願佛及衆愍念降臨當盡此生奉上僧伽梨飲食湯藥并卧具種種受用不使乏少佛正徧知願鑒虔切去人領意到於佛所以長者言具白世尊復倍虔心而伸告請傳意已畢五體著地禮佛雙足旋繞三匝願住佛前佛利樂故默然許之去人知佛決定赴請速還舍衛見於長者而白言云世尊默然必來降赴長者歡喜於是陳列傘蓋幢幡名香妙華處處迎接爾時世尊告諸大衆阿羅漢等可共往赴給孤之請佛領大衆前後圍繞離王舍城詣舍衛國瞻顧左右告羅漢等我此眷屬是調伏是離

欲是善解脫是阿羅漢是佛眷屬譬如牛王處於衆群亦如象王衆象圍繞師子王師子圍繞鵝王鵝衆圍繞金翅王金翅圍繞又如衆學隨師衆病求醫衆兵輔將衆商依主又如轉輪聖王千子圍繞持國天王樂神圍繞增長天王鳩槃荼鬼圍繞廣目天王龍衆圍繞多聞天王夜叉圍繞日天千光圍繞月天星宿圍繞帝釋天衆圍繞梵王梵衆圍繞乃至復如悉帝彌魚處於海中亦如海神攝聚衆水如來之身三十二相八十種好具足圓滿光明莊嚴如千日光照耀一切行步巍巍猶如寶山具足大悲十力四無畏等一切諸法爾時世尊成就如是殊勝威德解脫眷屬次第行化至舍衛國時給孤長者與其眷屬將諸侍人各各執持幢幡寶蓋及妙香華出

舍衛城遠迎世尊及大聖衆復有國中長者士庶若男若女百千人衆亦來迎接又有無數諸天在虛空中隨喜讚歎爾時世尊入城門時即以右足蹈其門閭於是大地六種震動放大光明照耀世間天鼓自鳴雨衆天華所謂優鉢羅華鉢捺摩華俱母那華奔拏里迦華乃至曼陀羅劫樹等華又降沉檀及多摩羅等衆妙香末又復舍中種種音樂不鼓自鳴盲者得視聾者聞聲啞者能言不完具者皆得完具迷醉者得醒食毒者自安相憎者和解禁縛者解脫懷妊者得生男至貧者得豐資財世尊入城之時乃有如是百千吉祥瑞應利益之事至長者宅佛與大衆次第而坐長者所有若親若疎一切眷屬皆來焚香散華禮拜供養種種畢已給孤長者執爐

焚香引佛世尊入於精舍佛昇寶座諸阿羅漢亦皆就坐時給孤長者即取金瓶欲灌世尊網縵之手瀉水不出長者思惟我莫昔有不善業耶乃於今日致有斯事佛告長者無不善業但爲此地汝於過去正等正覺已曾捨施修爲精舍勿作住心今爲能施若離此者水必流出長者對曰如佛所說作是語已瓶水出聲具五功德灌佛手已願佛隨意又復白言請爲立名時祇陀童子亦在佛會作是念曰佛若知者先說我名佛應所思立精舍名號祇樹給孤獨園祇陀童子得聞是已乃於如來轉倍發心歡喜愛樂更以四寶莊嚴其門祇樹給孤精舍之名因此所立爾時舍衛國主勝軍大王聞佛遊化來入其國受給孤長者請住於精舍歡喜踊躍詣於佛所

命七

十九

以種種語讚歎世尊禮拜旋繞却坐一面作是言曰我聞瞿曇沙門知自心相證得阿耨多羅三藐三菩提瞿曇沙門依法喜論說彼所有心亦得名邪亦得名正亦可作善亦可作惡而此心相無有去來不可知不可說是甚深法云何可知佛言王所說者乃是真實而彼心者亦得名邪亦得名正亦可作善亦可作惡而此心相無有去來不可知不可說是甚深法我知是心證得無上正等正覺王言瞿曇沙門云何乃作如是之說彼有耆舊迦葉摩蹉梨娑舍離子散惹曳尾囉致子阿咤多計舍劍末羅迦俱那迦旦也二合野曩彌誡囉陀倪也二合帝子彼等亦知心相尚不證無上正等正覺云何沙門少年始新出家言證無上正等正覺佛言大王勿作是說世有

四事不得輕慢何者爲四一者王子不得輕慢二者龍小不得輕慢三者火小不得輕慢四者僧小不得輕慢何以故而彼王子生利利種具足王相有大福德於後成長必紹尊位愚人無智謂小可慢彼處寶位獲罪無悔又復龍者稟性毒惡變現不恒或隱大身作小形質愚人不識輕慢觸惱須臾恚怒翻被傷害又復火者能燒一切或見微少不得輕慢人若輕者後必蔓延聚落山林皆悉燒壞又復僧者清淨自守雖是年少不得輕慢見道證果非止老幼亦復不擇久近貴賤世人無慧不辯凡聖遇阿羅漢輕起毀辱所獲罪報如斷多羅樹頭不得再生雖勤懺謝亦不除滅時勝軍王得聞如來說是四法深心信受追悔言過即以頭面禮佛雙足懺謝旋繞

命七

二十

歡喜而退爾時世尊於舍衛國化利畢已思欲往彼迦毗羅城時勝軍王承佛化導心堅歸向遂發使奉書上淨飯王汝皇太子悉達多證得無上甘露法味於世出世間咸蒙濟度淨飯王聞已遽即思慮雖喜我子已成正覺今若遣使定化出家以手搢頤再三詳審時有大臣名烏那曳曩見王如是而發問言大王云何搢頤不樂王即報言我非不樂有所思事勝軍大王有書報我悉達太子已成正覺在舍衛國給孤精舍有千弟子皆阿羅漢我昔爲彼苦行去時發人尋求至今不迴今若遣使定是不復云何可知有如此事彼悉達多聰明智慧咸悉過人凡所言說誰不諦信我以此事而思慮之烏那曳曩即白王言臣今請行願勿爲慮王曰唯汝一人我常

在念若能爾者誠爲大善王即親手而修書
曰汝一切義成是我親子既厭煩惱棄國出
家爲求無上正等正覺已聞成道教化衆生
思念之心日時相續令他人得樂唯我苦惱
譬如大樹因地而生既有根苗終望果實汝
心已遂宜憶往願昔者所言若不證無上菩
提寂靜之道誓不再入迦毗羅城大行已成
宜應愍我及眷屬等烏那曳曩從王受書速
至舍衛行詣精舍既至佛所白言世尊父王
淨飯致書於佛言訖捧上佛乃親受開封披
讀須臾默然時烏那曳曩又白佛言今請世
尊去迦毗羅城佛言我去烏那曳曩即五體
投地方伸禮敬禮已再禮以至於極又白佛
言世尊若去斯亦無言或不去者必堅請去
爾時世尊爲烏那曳曩說伽陀曰

佛眼淨能見 無所著之者 見無邊不往
汝何能將往 佛眼見無邊 不著貪愛者
精進力無往 汝何能將往 若人心不亂
彼亦無降伏 無邊智無步 汝何能堅往
若人有得無降伏 彼亦無有不降伏
如佛進力步無邊 汝以何步能堅往
時烏那曳曩白世尊言我欲持此所說偈頌
聞淨飯王佛告烏那曳曩我意不爾又曰若
不爾者其意云何佛言欲汝出家又曰我本
來時與王有約若是見佛定須迴還佛言汝
勿違約要去可去但剃髮染衣斯亦無礙烏
那曳曩言世尊爲菩薩時尚依父母師長之
所教授我今何敢不依教也今求出家願佛
濟度佛即應時度爲沙門佛便告言烏那曳
曩汝今可往若到本國至宮城門不得便入

但立門外請報於王或問何名稱釋迦苾芻
王或呼召乃可前進又若問言汝實是釋迦
苾芻否即答是實若問一切義成亦如是像
耶答言亦爾又問一切義成來否言來當在
何時便言後當七日言訖便出若留者亦不
得住王曰一切義成若來住宮內否答言不
住王曰樂住何處答曰林野或住精舍若問
何名精舍便可如祇樹給孤精舍具以聞奏
佛教示已烏那曳曩欲行佛又告言王者一
言便成富貴天起心念一切皆得一切聖人
亦復如是佛借神力烏那曳曩於剎那頃到
迦毗羅城如佛所教心住正念到宮城門住
立不進謂闍吏曰汝可奏聞有釋迦苾芻詣
門不進王令呼入時烏那曳曩蒙召即入淨
飯纔見怪而問曰烏那曳曩汝出家耶答言

出家王言汝當去時何言奏我答曰奉命即
爾本不出家世尊威神方便開化佛世難值
正法難聞皇子尚捨至尊小臣何可固執王
言似責心實不瞋又以儀相非常不以舊臣
見待即命上殿執手慰勞乃令近臣敷座盥
淨奉上湯藥及果食等烏那曳曩威儀非凡
舉止有則言必詳審情極和暢王以初覩烏
那曳曩剃髮易服言論久之全忘問佛及至
於此而復問言我子一切義成善相威儀亦
如此耶答言以我喻佛由將芥子等須彌山
又如牛跡比於大海乃至窓牖之明同彼日
光王聞是語思念於子不覺悶絕仆於地上
近臣以水灑面方穌良久復問我子來耶答
來又曰何時到來後當七日王即下勅潔淨
內宮嚴飾殿宇以備世尊及聖衆至烏那曳

曩白大王言世尊若來不住宮內王曰樂住何處若非林野即住精舍王曰何名精舍烏那曳曩即以精舍次第白於王曰十六殿堂六十小堂世尊居中聖衆四布諸受用具悉使備足王聞說已遣使速往你也合二誡嚕馱林克日併功如給孤精舍次第建立倍持珍寶而嚴飾之爾時世尊至時遣大目犍連汝可徧告諸苾芻衆我今欲往迦毗羅城宜各受持袈裟應器或可爲見父母宗親而行化利大目犍連奉佛教勅具以佛言徧告一切阿羅漢等已佛領大衆出給孤精舍往赴迦毗羅城父王之請諸阿羅漢前後圍繞佛即瞻顧謂阿羅漢等曰我此眷屬是調伏是離欲是善解脫是阿羅漢是佛眷屬譬如牛王處於衆群亦如象王衆象圍繞師子王師子

圍繞鵝王衆鵝圍繞金翅王金翅圍繞又如衆學隨師衆病求醫衆兵輔將衆商依主又如轉輪聖王千子圍繞持國天王樂神圍繞增長天王鳩槃荼鬼圍繞廣目天王龍衆圍繞多聞天王夜叉圍繞日天千光圍繞月天衆星圍繞帝釋天衆圍繞梵王梵衆圍繞乃至復如悉帝彌魚處於海中亦如海神攝聚衆水如來之身三十二相八十種好具足圓滿光明莊嚴如千日光照耀一切行步巍巍猶如寶山具足大悲十力四無所畏等一切諸法爾時世尊與是眷屬隨路而去次第遊化至迦毗羅城不遠有嚕賀迦河時淨飯王將諸眷屬及大小臣同在河邊預嚴寶蓋幢幡擊鼓吹貝廣設妓樂焚香散華顙望世尊又復自嚕賀迦河至你也合二誡嚕馱林乃至

城中及與郊外王勑士庶預令嚴潔丘虛沙礫悉使除去布以淨土灑以香水量其遠近各置香爐俟佛經過焚香供養時迦毗羅城士庶長者若男若女各各執持殊妙香華立於路次供養世尊是彼人衆咸謂世尊昔爲太子今得成佛歡喜踊躍欲觀儀範又有起念父子相見其禮云何若子拜父與世無殊若父拜子國禮未可太子修道苦行成佛必應與世有別異也人衆填噎路無間隙佛與聖衆將至河次知王眷屬悉在彼處乃自思惟今迦毗羅城父王眷屬及人民等各各念言太子去時百千天人前後圍遶乘空而去雪山修行又云已成正覺領衆化導今徒步歸國有何奇特我今宜應現其神足令父王見及使人民歎異歡喜王及眷屬目見大衆

命七

二十五

方欲奔趨迎接世尊佛於是時入三摩地出於東方虛空之中現行立坐卧四威儀相或身上出水身下出火身上出火身下出水復於身中放大光明或青或黃或赤或白及與紅等間雜諸色猶如玻璃互相映徹乃至南西北方亦復如是又諸苾芻各各現通踊身上升高七多羅樹世尊於中亦現一身諸苾芻衆現通不等或六多羅樹或五或四或三二一佛恒高出與衆有異如是現已佛與聖衆忽然隱沒如彈指頃已在本處王及眷屬倍生信仰旣前迎接王見大衆皆被袈裟儀相相似初不辯認誰是世尊孰爲弟子時烏那曳曩引淨飯王至世尊前王見世尊尚存子想烏那曳曩乃謂王曰如來斷煩惱習心得自在如日照世住於虛空乘真如乘證最

衆許摩訶帝經卷第十三

命八

宋西天譯經三藏朝散大夫試鴻臚少卿明教大師法賢奉詔譯

爾時淨飯王說是語已心有所思忽然淚下
復說伽陀問世尊曰

往昔住宮中 多人同衛護 山野中怖畏

一身云何住

世尊答曰

聖者十種住 我悉已安處 牢繫今解脫

非住人王宮

王曰

象牀金寶飾 昔爲汝所寢 山野唯草木

云何得安眠

答曰

解脫之卧具 菩提分莊嚴 眠睡甚適悅

無一切熱惱

王曰

象馬及輦輿 昔出入所乘 一切棘刺地

今云何可行

答曰

我有神足車 精勤乘往復 雖行一切地

不礙煩惱刺

王曰

迦釋迦妙衣 嚴身昔自在 今袈裟麤衣

云何忍被服

答曰

僧伽梨麤衣 牟尼山中服 著已善相生

見者皆深悅

王曰

金寶器中食 恒食最上味 今自持應器

所食知云何

答曰

等引法味最 食之得出離 已斷世間受

慙世故行化

王曰

乳糖水甘美 飲之昔無厭 今所飲冷熱

清濁知云何

答曰

王貴盛之水 世間人爭飲 飲已或增淙

如我無愛樂

王曰

寶殿及樓閣 昔者隨心住 今獨處山林

云何得無怖

答曰

已斷煩惱本 諸怖畏不生 極微我亦無

隨處得安住

王曰

清淨妙香水 昔時恒沐浴 今獨山野中

誰浴牟尼王

答曰

戒香漬法水 有德人恒浴 潔身到彼岸

無量聖所說

王曰

昔妙香塗身 及著迦釋衣 恒處內宮殿

離彼非相稱

答曰

戒香最粉馥 用途身莊嚴 我今非愚迷

離寶衣嚴飾

王曰

何處得輕慢 何處可怖畏 無事及有事

今問願當說

答曰

老病死三法 可怖勿輕慢 當求適悅境
無事應愛樂

爾時淨飯王聞是說已歡喜無量讚言善生
釋族於世八法而皆不染復以頭面禮如來
足又復思惟我得善利我子乃證如是功德
王與眷屬奉送世尊入你也二誡嚕駄林精
舍爾時世尊既至精舍登法座已王及大臣
乃至士庶圍繞瞻仰虛空諸天歡喜讚歎佛
觀會衆各各心意及與根性如實知已廣爲
解說四聖諦法時白淨飯王及釋衆等七十
七千人皆證須陀洹果世尊又觀何處緣熟
彼梵現林時可說法佛與大衆悉詣彼處無
量人衆相隨聽法世尊廣說四諦行相彼斛
飯王迨於釋衆乃至人天有七十六千人又

證須陀洹果世尊復詣嚕駄林亦有無
量天人釋衆眷屬人民士庶隨佛聽法世尊
同前廣演四諦甘露飯王及釋衆等乃至人
天有七十五千人證須陀洹果餘有證斯陀
含果者有證阿那含果者有證阿羅漢果者
有發聲聞菩提心者有發辟支菩提心者有
發無上菩提心者亦有出家斷諸煩惱後證
阿羅漢果者乃至有發三歸心者時提婆達
多既見世尊現於神變及說妙法自無所證
乃生妬心發不善言謂釋衆曰一切盲人樂
斯幻化此幻化事今八一切能作有一釋衆名鉢
羅摩拏野告提婆達多言汝勿於世尊大丈
夫所發如是惡言提婆達多尋便默然時淨
飯王起心思惟昔者天人阿脩羅爲世間供
養今佛出世真是世間恭敬供養有釋童子

說偈讚佛曰

釋種大僊大丈夫 能降妙法甘露雨

救濟墮落黑闇者 開解脫門爲引導

爾時淨飯王聞此童子說偈讚佛深心歡喜
然於真實而未見諦唯云世尊是大丈夫具

大威德誰有聖子而同我耶世尊思惟父淨
飯王不見真實乃爲二事一者我心二者分
別心若能離此可見真實佛觀大目度連於
淨飯王而有宿因佛謂大目度連曰汝以方
便化淨飯王令離我執於是大目度連即詣
王處王見尊者心便歡喜尊者應時入三摩
地隱於王前乃出東方虛空之中現行立坐
卧四威儀相又復身中放五色光猶如玻瓈
互相映徹或身上出水身下上火或身上出
火身下出水如是種種現於神變東方若此

八

五

南西北方亦復如是作神變已沒於虛空如
彈指頃已在王前王曰佛弟子中更有如尊
者否時大目度連即說偈曰

世尊弟子大威德 三明六通皆自在

解脫三界阿羅漢 聲聞牟尼如我多

時淨飯王初謂世尊獨有是事心中常存我
執之相及大目度連現神變已乃知弟子亦
有斯證王之我心由此得滅於是世尊即以
方便作世間心云何得梵王帝釋及淨光天
來我爲說法於意云何如來之心非聲聞菩
薩之所能知所以然者世間之心下至蟻子
尚令得知何況諸天於是帝釋告毗首羯磨
天子言汝化你二合誡嚕駄林作大法會其
中臺殿樓閣悉安師子之座咸以衆寶而爲
嚴飾復開四門各以四寶莊嚴復令四大大

王而守護之時毗首羯磨天子承帝釋命變大法會種種嚴飾如帝釋教仍令四王爲守門者作變化已白於世尊法會已成請佛往彼是時世尊與自眷屬及梵王帝釋淨光天等無數百千之衆還你也合誡嚕駄林佛既到已入於寶殿昇師子座即說妙法時尊者大目犍連與淨飯王同詣佛所至法會門尊者直入王即止住王曰何故障我對曰佛爲淨光天等說法凡人不得預會王曰汝何賢聖居此守門對曰我是持國天王時王乃問東門即爾南門可否對曰不知既至南門復不得入王乃問言何故如是對曰佛爲淨光諸天說法凡人不得預會又問汝何賢聖居此守門對曰我即增長天王故守南門王自惟曰我去西門應恐得入既至於彼亦不得

入王又審問何故如是對復如前又問汝何賢聖答曰我是廣目天王淨飯王長息歎曰聖凡相隔雖近至遠既心切見佛更往北門至彼同前止不令入王即厲聲謂守門者曰賢聖勿是北方天王否對曰我即毗沙門也時淨飯王聞此語已迫將悶絕又復思惟我雖至親今則踈遠我親分別從此泯滅於是世尊知無分別又察情極若不時見恐致無常佛以神力變樓臺殿閣乃至垣牆悉成玻瓈清淨映徹內外相觀無所障礙王得見佛心極歡喜即便禮拜於一面坐爾時世尊種種方便化其父王令無我心及除分別即爲廣說苦集滅道四聖諦法王得聞已所有身見如二十山峯以金剛智破滅無餘便證須陀洹果王思念曰我今所證非天非仙非父

非母亦非親愛一切眷屬之所獲得當從如
來慈孝所致又復思惟我於過去輪迴生死
骨聚如山血淚成海或復墮落諸惡趣中今
日乃入解脫門預於聖道又復言云善哉世
尊往昔修行無數苦行不顧身命爲利衆生
我今更求殊勝命八天報佛即作念王今云何求
斯報也時淨飯王即從座起合掌頂禮白世
尊言今欲請佛及諸聖衆於我宮中來晨受
食唯願大慈咸垂降赴佛即默然王知許已
禮謝而歸纔至宮中詔白淨飯王告而言曰
我已證道不樂王位汝受灌頂代我理國白
淨飯王問何時證耶答曰適於你也二誡嚕
駄林聞法得證白淨飯王曰世尊初到彼林
我已得證王云代位我實不能又詔斛飯王
曰汝可灌頂代我理國對曰我於梵現林中

聞法證果所言代位誠不樂也又謂甘露飯
王曰汝受灌頂代我理國對曰我於嚕咤多
迦林聞法證果今亦不樂處王位也淨飯王
曰若如是者當令何人守宗社也諸王咸言
釋族之中有賢德者可令守之議事已畢淨
飯王曰速令所司辦造種種珍饌飲食令極
香美又勅潔淨內外除去葷穢於正殿上當
以清淨茵褥及上妙衣敷置如來及聖衆坐
位復設香華及淨水瓶無使闕備既至來晨
遣使白佛今食已辦請佛及衆同賜降臨爾
時世尊與諸聖衆前後圍繞行詣王宮受食
供養佛至宮門王與眷屬執爐焚香引世尊
入佛昇座已諸聖衆等次第就坐時淨飯王
與諸眷屬禮拜問訊讚歎訖即親手奉上種
種飲食而伸供養食畢澡漱供心圓滿時淨

飯王即取金瓶灌世尊手白言奉施你也合
誡嚕馱林精舍願佛隨意瓶水出時有五功
德聲佛亦施願云以所施福王及釋族一切
所求隨意獲得王及眷屬聞是語已歡喜踊
躍禮佛而退佛及聖衆迴還精舍後於一日
世尊復在王宮受食王之眷屬互相謂曰今
世尊左右皆是耆年善相威儀誠堪仰重然
侍奉世尊未爲允當可於釋族選其年少有
賢善者便令出家侍佛左右貴得相稱時淨
飯王勅下親族內外臣佐令一切義成捨轉
輪王位苦行修習爲大法王宜各選其賢子
捨令出家侍從世尊以成其美時斛飯王有
二子一名阿你嚕馱二名摩賀曩摩彼摩賀
曩摩能理王務然貪財利阿你嚕馱常處宮
中隨意受樂時斛飯王以勅旨宣下乃呼摩

賀曩摩汝可出家以奉王命子曰我不出家
彼阿你嚕馱常在宮中受其快樂可令出家
父言彼子福德汝勿指陳子曰此是父母愛
憐所許若實有福當可試驗父曰當何試驗
子曰常式送食今可空盤送之若其有福食
自然出父即對面封以空盤令宮嬪送之誠
曰若問何食但對種種在內時天帝釋觀知
此事阿你嚕馱昔曾以食供辟支佛今日云
何令其無食乃化種種珍美品饌滿彼空盤
女使至彼阿你嚕馱問言何物宮嬪心瞋不
依誠勅答言無物阿你嚕馱即思念曰父母
云何送空盤耶乃開封視之異饌滿中人所
罕見馨香馥馥園苑皆滿阿你嚕馱意亦深
怪問彼女言本有食耶本空盤耶女曰空盤
遂却以此食奉上父母父母見食亦不驚怪

又以此食示摩賀囊摩汝看此食是彼化出彼阿嚕馱人皆愛樂我言大福非汝等力汝初不信今已驗知摩賀囊摩白父母言彼既大福可令出家我今無福非出家者父母即謂阿你嚕馱曰王今有勅汝出家否對曰出家有何利益在家有何過失父母言出家之人當證涅槃可受天上人間第一供養若人在家出家真實離欲亦得天上人間供養若是在家妄稱出家當感三惡道報對曰出家在家得利失利我已曉了今欲出家上副王命父母告曰汝言大善時阿你嚕馱有一同年名曰賢王最相知見乃往彼處而相告白至賢王門方聞品琴又值絃斷五音不足阿你嚕馱擅琴之聲止立不進待其調品令人入報賢王請入謂阿你嚕馱曰汝來何時答

曰琴絃初斷我已到門待其調品方令入報賢王稱善執手請坐汝今何來對曰淨飯王有勅令釋族出家意欲眷屬侍佛左右以汝慕善故來相報賢王曰勅旨纔下尋亦便知汝既出家我亦同往汝可今夜宿於我舍阿你嚕馱隨言即止賢王令人爲敷卧處至夜眠睡無少安樂明晨相見賢王問言得安睡否報言不得安睡又問何故如是對曰牀所鋪者病觸之衣是以令我不獲安寢賢王即喚所司侍人問其緣由自何而得對曰王初生時敷設餘長後因疾患曾已受用賢王歎曰善哉釋族生此異子又言我出家者提婆達多次當王位乃令左右呼提婆達多到已問言我等奉勅咸去出家未委汝今當何所作時提婆達多私自念曰若或我言不出家

者即令賢王亦不出家便以誑言我亦出家時彼賢王速以公文奏淨飯王王乃下勅告示內外令賢王阿你嚕駄及提婆達多等釋種五百人出家咸可知悉勅出之後中外歡喜唯提婆達多獨自苦惱意云本作方便欲令賢王出家今或違言有妄語過使我將來不得王位於是剛忍隨衆出家時淨飯王欲令後代知族尊貴宣告內外凡是街衢迨及城隍一切嚴飾皆使殊勝布以淨土灑以香水復非幢幡傘蓋散華燒香以擬賢王等五百釋種出家經過彼釋種等各各父母於衢路側及城門首敷設觀看亦命相師各相其子誰可出家誰當不可賢王先出相師稱歎此若出家必證聖道阿你嚕駄次行出城相師亦云得聖非久提婆達多出至城門頭上

命八

十一

寶冠忽然墮地相師見已此惡業人定入地獄又不善人名曰海壽纔到門際驢作惡聲相者知之此有口業曾謗聲聞當來果熟定墮惡趣烏波難陀次出乘象方至門首瓔珞墮地乃自下象親手收取相師言曰此鄙悞人當入地獄如是五百釋種各各出已相師皆見咸以善惡具告父母時釋衆等出迦毗羅城復遊園苑次至佛處各各白佛云求出家世尊思惟今此釋衆雖求出家有志樂者有不樂者佛以四法度爲苾芻時淨飯王有承事人名烏波梨善能剃髮王即遣與釋衆剃髮既至彼處不肯與剃乃作色煩惱又復悲泣賢王問言何以如是烏波梨曰我奉一人非衆所使可寧捨命髮不能剃賢王諫曰勿作是言汝奉王命非衆可使此有善利請

無煩惱賢王復以方便告釋衆曰汝等出家
寶冠妙衣及莊嚴具今日已去咸無所用都
置一處與烏波梨彼聞得者或可歡喜衣冠
既集乃成大聚時烏波梨即與剃髮及觀釋
衆各各年少捨其富貴我今卑族何所戀耶
宜可棄彼恩愛去離煩惱免其輪迴生滅之
患於是耨頤再三忖度尊者舍利弗見而問
曰汝何耨頤似有不樂答言非是不樂有所
思念具以情實告舍利弗舍利弗謂曰世尊
度脫非問尊卑今正是時宜其猛利世尊預
知專期根熟舍利弗將烏波梨來至佛前五
體投地伸其禮敬白言世尊今烏波梨欲於
正法出家願佛哀愍佛告烏波梨言汝得梵
行世尊言訖鬚髮自落袈裟著身後七日中
鬚髮再出威儀庠序如百臘苾芻自說伽陀

命八

十二

曰
我今於如來 正法求出家 佛言得梵行
鬚髮尋自落 袈裟亦著身 此即從善本
今日方成熟 故我爲苾芻
爾時世尊告大衆言今出家者可依夏臘次
第守其尊卑乃至未來禮不得闕於是烏波
梨平視諸釋時彼賢王次第禮衆至烏波梨
前不肯禮拜來白世尊今烏波梨是承事人
今我禮者是不順也佛言汝既出家當除我
相彼是上臘宜伸禮敬賢王纔禮地六震動
次提婆達多亦不肯禮又來白佛佛言出家
之人當除我相彼是上臘宜可禮足於是諸
釋無不禮者諸苾芻等各各心疑今賢王禮
拜地六種動有何因緣唯願世尊解諸疑網
佛言過去世時此閻浮提波羅柰國有王統

御名曰梵壽國界豐盛人民快樂時彼城中
有一倡女名跋捺囉色相端嚴人所愛羨有
一男子名孫那囉摩拏縛迦往彼女處言意
相慕女即報云備五百金錢可來相見是人
貧賈莫副所言別以方便而親附之遂移居
相鄰時奉華果後因節序男女作樂嚴身戴
華各銜其美時跋捺囉起思念曰孫那囉摩
拏縛迦彼人若來共作喜樂須臾來至女即
喜曰可取華來與汝作樂孫那囉摩拏縛迦
此日有事心極煩惱通宵無睡及天將曉熟
寐不覺衆人取華好者已盡乃得尸利沙華
將與彼女彼女不悅即說偈言
戒不精進業 怠惰重睡眠 衆採好華去
得尸利沙華
又復告言汝求別華時初秋月暑氣猶鬱乃

再去尋華以至中下採華唱歌都不覺熱值
梵壽王入草詣林避熱忽聞歌唱令人尋求
見已呼來乃謂之曰日光下照如火燒腦云
何歌唱都無所苦即以伽陀對曰
我心迷故非日不照爲事有少故不知苦
時王思惟此採華人能言乃留與語王曰我
出值熱來此求涼汝可以言解我熱惱孫那
囉摩拏縛迦本有智慧所言稱旨乃說征伐
之利投王心機王聞歎奇即忘熱惱宣問大
臣有於刹帝利灌頂王所假身命難者最上
之賜國有何典大臣對曰可與諸君即勅大
臣冊居其位告報內外准式備儀禮赴春宮
尊處儲貳凡曰受用無非珍寶寢卧之所茵
褥異常孫那囉摩拏縛迦私自惟曰儲君若
此尊極可知便起貪心欲謀大寶纔發斯念

便自覺知我或如斯堪云來報由是追悔寢不安處乃施麤席卧於地上至明旦已王即遣使觀其動止乃見孫那囉摩拏縛迦卧於地上速來白王此非儲君乃賤人爾王曰何知具事上聞王曰此大智人非是賤士乃令詔來詢問其故王曰夜不寢牀卧於地者何意對曰貴非究竟所以不樂王曰汝意如何今欲出家王復言曰未知此事云何出家有何功德答言於寂靜處苦節修行亦無聖師亦不求侶觀緣究理證獨覺菩提王即稱善放令出家後證道果來至王前於虛空中現神變相王親是事深生歸信五體投地以伸敬禮即說伽陀曰

善哉智慧人 非惡業能繫 求寂靜修行 證獨覺菩提

說伽陀已又復言云若有諸摩拏縛迦出家求道我即隨喜時有近臣名旃誡波羅聞此偈已忻樂非常記憶在心誠其貪愛王因此後亦自勗勵乃踈宮室多樂寂靜旃誡波羅後接王喜遂求出家王既允許拜辭而出即詣深山逢苦行仙人便隨學道精勤策勵亦證五通徑來王前現其神變王乃問曰汝得如是功德耶答曰我證王謂證聖便禮其足頭纔至地地即震動是時王毋察此非真乃為旃誡波羅說伽陀曰

若根本出家 禮事於沙門 寂默及精進 苦行成緣覺 一切罪永滅 一切福業生 後於諸世間 廣利樂衆生 佛告諸苾芻昔梵壽王者今賢王是旃誡波羅者烏波梨是往昔禮拜地已震動今日致

衆許摩訶帝經卷第十三

音釋

漬

疾智切

粉馥

切韻
粉敷
讀文

切馥房
香氣也

六

鉸

切古
釘效

也鉞

擅時戰專也

切街

自焚
矜緝
也切

信者
副陳
威如

也切

殍切其陵

勛

勵
切
最

勵玉
勉切

力也。